

# JEHOFA WA MEHLOLO



Ke na le nnete lena bohle le ikwela feela boka ke dira. Ke nno tsoga ka nako go kwa khwaere yela e opela. Nna, ke rata yeo. A le ratile yeo? Oo, nna, yeo ka kgonthe e be e le ye botse. Ka mehla ke boletše gore nna . . . ge ke fihla mošola wa noka ge o nyaka go ntebelela, gobaneng, nno hwetša moo ba opelago godimo kua, gomme ke tla be ke dutše tikologong felotsoko. Ke nyaka go kwa digalontšu tšohle tšela di tsenelana mmogo ka go khwaere ye kgolo yela, ya barongwa, nka kgona go theetša yeo nako ye telele.

<sup>2</sup> Ka mehla ke be ke nyaka go opela, gomme ke be ke no se kgone, ke no se kgone go opela le gatee, e no ba . . . Ke—ke lekile go opela nako ye nngwe, gabotse, makga a mmalwa, *Mogau Wa Go Makatša*. Mogatšaka o mo bjale, gomme feela ka pela ge ke e boletše, o thoma ka diatla tša gagwe ka mkgwa *wola*, “O se e leke, o se e leke.” Le a bona? Kafao o se tshwenyege, Hani, nka se ke, ke ithutile bokaonana.

<sup>3</sup> Eupša letšatši le lengwe ge o fihla godimo ka ntlongkgoparara ya gago ye kgolo godimo kua ka Legodimong felotsoko, gomme o theetša tlaselase mo khoneng ya dithokgwa, moo ntlo yela ye nnyane ya dikota e agilwego o ekwa yo mongwe ntle mathuding a ka pele a opela, *Mogau Wa Go Makatša*, o re, “Ngwanešu Branham o e kgonne, šole yena.” Ke nyaka go ba godimo kua le lena.

<sup>4</sup> Le ke letšatši le legolo, ka gore Morena o dirile letšatši le. Gomme ga go pelaelo gore bontši bja lena ka ditirelong tša lena mosong wo le ipshinne ka kopanelo ya go makatša ya molaetša wa modiša wa lena. Gomme seo ke se sebotse, ke thabile kudu gore le dirile. Gomme e nong go elelwa: Mo thekgeng ka thapelo, ke modiši wa mohlape, gomme modiši ke mofepi, kafao le mo thekge ka thapelo, gomme le mo thekge ka tšela ye nngwe le ye nngwe le kgonago, gomme Modimo o tla tšwelapele a efa melaetša yeo ka yena.

<sup>5</sup> Gomme bjale, go lena basokologi ba baswa bao le sa tšogo sokologa ka kopanong ye, ga ke tsebe feela ke ba bakae, eupša go bile le lešaba le legolo leo le tlilego pele go amogela Kriste. Bjale, o se no tsekella go bapa, gomme wa re, “Gabotse, seo se lokile,” eupša tšea kopanelo ya gago le tše dingwe tša dikereke tše, ye tee ye e lego kgauswiuswi le wena, goba ye tee ye o e kgethago.

<sup>6</sup> Gomme ka gona, banna ba, lebaka le ba thekgago dikopano tše ka tšhelete ke ka gobane ba dumela bodiredi bjo, ba a bo dumela; ba be ba ka se dule godimo mo go e emela, ge ba be ba sa bo dumele. Ba rera tlwa selo sa go swana seo ke se dirago, Ebangedi ya go tlala, gomme ka kgonthe ba tla le dira gabotse.

7 Ge nkabe ke dula fa ka San Jose, ke be ke tla ba wa kereke, ye nngwe ya dikereke tše, yeo ke phetšego kgauswiuwi le yona, ke be ke tla ba wa kereke yela, gobane ke—ke dumela go yona. Ke mo go e emela, gomme ke a dumela ke Kereke ya Modimo yo a phelago. Gomme ka kgonthe ke leboga tirišano ya lena, le tirišano ya bona, le bohle mmogo, bjale, re tliša disoulo tše mpsha ka gare go Mmušo wa Modimo, gomme Modimo o tla thaba gobane bana ba baswa ba tswetšwe ka lapeng la Gagwe.

8 Bjale, gosasa bošego, re na le Labohlano bošego, ka gona Mokibelo mosong ke Difihlolo tša Banna ba Kgwebo ba Full Gospel. Ke filwe monyetla le tlhompho go bolela difihlong tše. Gomme ke rata go bolela go tšeo, Morena ge a rata, Mokibelo mosong. Ke a thanka ba šetše ba go tsebišitše, moo di tla bago gona. Gomme ka gona Lamorena morago ga sekgalela, morago mo bakeng sa tirelo ya rena ya go tswalela.

9 Gomme ke nyaka go bolela bošegong bjo: Ge go se selo gape se diregago magareng ga bjale le tirelo ya go tswalela, ke tla leboga Modimo ge feela ke phela bakeng sa kopano ye. E bile kopano ya go makatša. Se sengwe sa dilo tša go ikgetha kudukudu ka yona ke kopano yela, maikutlo ale a kopanelo ya sekgauswi, go no tlemagana mmogo, seo ke se ke se ratago, ke moo Moya wo Mokgethwa o ka šomago. Fa mo sefaleng, go bonolo kudu go baena ba.

10 Le a tseba, ke bone nako yeo ke bego ke swanetše, gabotse, go ba le batho go tloga sefaleng go tloga ka morago ga ka go direla, ba bantši ba lena bohle le bone seo. Eupša ka kopanong ye, ga se ka bolela selo, gobane go be go no ba tirišano ya go tlala kudu mogohle, gomme bona banna fale ba nthapediša, le ntle fa, go fihla go be go no ba bothakga.

11 Ga se ka retologa le go bolela selo, go ne ba bangwe ba badiredi ba, ba a babja, ke a e tseba. Se tshwenyegeng, go tla loka. Le a bona? Gobane ke badiši, ge nka retologela go bona gomme ka tlogela yo mongwe ka go batheeletši, ba ka rata bokaone e be yo mongwe wa batheeletši ba bona, go feta go ba bonabeng. Woo e be e tla ba mokgwatebelelo, ka kgonthe ke—ke dumela gore ba be tla o tšea, gomme kafao, batho ba maswanedi.

12 Disakatuku tše, le dilo, tšeo di beilwego godimo bjale, morago ga nthatana, pele, ge ke rapelela balwetši, ke tla ya godimo le go di rapelela, le tšona, gobane bokaone ke di rapelele ge ke ikwela tlotšo ya Moya wo Mokgethwa godimo ga—godimo ga phuthego le gohle go dikologa.

13 Ke a nagana: Go ka reng ge sakatuku se mo, noute ye nnyane yela e kgomareditšwego godimo ga sona, se be se eya go mme wa ka, gomme a be a robetše ka seemong sa go hwa? Go ka reng ge seo se be se eya go yo mongwe wa bana ba ka, gomme ba be ba robetše, ba ehwa? Ke be ke tla nyaka tlhokofalo kudukudu, gomme, yeo ke bego nka kgona go e hwetšwa go ngwanešu wa

ka go rapelela bao. Gabotse, se ka no ba se eya go mmago yo mongwe, goba ngwana wa yo mongwe, goba se sengwe, gomme re nyaka go ba tlhokofalo ya go tebatebi ya dilo tše, gona Modimo o tla araba thapelo.

<sup>14</sup> Bjale, seo se kgauswi, ke a tseba ke...kopano ye e be e kgorometša nako ya Krisemose. Re be re eya go tšea kopano ye nngwe godimo ka—ka Washington, Spokane, ke a dumela e be e le, goba, e sego Spokane, e be e le [Ngwanešu o re, “Yakima.”—Mor.] Yakima, Washington, eupša re a bona e kgoromeletša go leba Krisemose gannyane. Gomme dikopano tše di swanetše go thekgwa, le tseba seo, gobane ga ke ne mašelang go di thekga nnamong. Ga ke ikgopele peni e tee nnamong, feela gore ba lefe ditshenyegelo gore re se kolote selo, yeo ke phetho. Le a bona?

<sup>15</sup> Gomme bjale, ke—ke a šoma, ke—ke dira mogolo wa ka go tšwa kerekeng ya ka, ditolara tše lekgolo le tee ka beke ke se ke se hwetšago go tšwa kerekeng ya ka. Eupša kopano e swanetše go thekgwa. Gomme ka gona batho go bapa nako ye, le na le malapa le bana, ba bantši ba be ba mpotšiša, “Ka pela ge o tloga mo, a o tla tla kerekeng ya rena? O na le nako ye nnyane bjale.” Ke ya morago tabarenekeleng ya ka, gobane, bakeng sa tsošeletšo ye nnyane bakeng sa bona, feela bakeng sa bona, ka go ruta mokgwa wa go amogela Moya wo Mokgethwa, le go ya pele. Le a bona, re bokamorago bja Baptist kua, gomme kafao re nyaka go tsena ka go selo sa kgonthe le bona.

<sup>16</sup> Kafao lebaka ke sa dire, gobane ge nka ya ka kopanong ye nngwe, bomme le bopapa ba tla tšea go tšwa potleng ya bona go thekga kopano, gomme mohlomongwe lesea le lennyane le tla, baisa ba bannyane ba tla hlaelela se sengwe ka Krisemose, gomme seo se tla ntira ke ikwele gampe kudu, le a bona. Kafao ke tla tla morago ka morago ga Krisemose, gomme ka gona re tla—re tla thoma go tloga fao gape. Eupša feela pele ka Krisemose, ke rata go e tlogela feela se sengwe le se sengwe.

<sup>17</sup> Gomme ke duma ge nkabe ke kgona ka mašelang gore ebile le se tsoge la bolela ka moneelo. Ke swanetše go o bolela, go le bjalo, gobane ke dirile seo nako ye nngwe ka tšheke ye kgolo yeo yo mongwe a bego a eya go mpha, go feta ke naganne seo se swanetše go fiwa, eupša ga se nke ke—ke e amogele. Gomme kafao ngwanešu o rile, “Gabotse, ke tla go botša se ke tla se dirago, ke tla no tšea tšheke, ge o ka tla le go ya kopanong re ka se be le e ka ba...go tšea moneelo o tee, goba e ka ba eng.”

<sup>18</sup> Ke rile, “Seo se kaone, ke tla dira seo.” O rile nako yeo...Ke dirile seo gomme e be e se katlego. Batho ba swanetše go ba le se sengwe ka kopanong, le a bona, ke kopano ya bona.

<sup>19</sup> Gomme ba be ba tla kopana le nna mokgotheng, le go mpotšiša, “Bothata ke eng ka kopano ye? Ga re ne karolo ka go yona, ebile ga ba tšee moneelo.”

20 Kafao, moneelo ke karolo ya go rapela. Yeo ke nnete. Ke tseba kudu ka seo go feta ge e sa le go tloga letšatši le lengwe ge ke be ke eya go fa Hattie Wright morago ditolara tšela tše masomepedi tšeo a bego a dirile kenotshepišo go tabarenekele ye mpsha ka Jeffersonville, Morena o rile, “E no mo tlogela a nnoši.” Gomme metsotso e se mekae moragwana ke bona gobaneng A rile, “Mo tlogele.”

21 Kafao go tloga . . . Ke nno dira tshepišo ka pelong ya ka ke be ke sa ye go tsoge ka leka go thibela e ka ba mang yo a bego a nyaka go fa se sengwe go Mmušo wa Modimo. Ke e dirile makga a mantši, ke e ganne feela ka lebelo ka mo ke bego ke kgona, gomme ke lemogile gore ke hlakotše batho ka go dira seo, gobane Modimo o bile le lenaneo bakeng sa seo, gomme, goba A ka be a se a se bea.

22 Ga ke dumele go kgopeleng, aowa, mohlomphegi. Ga ke dumele go kgopeleng, goba batho . . . Eupša go no—go no botša batho, gomme go e lesa—go no e lesa e be ka mokgwa woo. Modimo o hlokomela ka moka ga yona. A ga le dumele seo? Nnete, O a dira. O e bea godimo ga pelo ya batho.

23 Eupša makga a mantši, ke nagana O e beile godimo ga dipelo tša bona go dira se sengwe, gomme ka gona ke retologile go dikologa le go thulana le seo ka go re, “Aowa, nka se e tšee, aowa, mohlomphegi, nka se e dire.” Ka gona ke nagana ka Jesu ka mohlologadi yo monnyane yola a beilego tšohle tša boiphedišo bja gagwe ka gare, dipeni tše tharo, le dikete tša ditolara monna wa mohumi a di beilego ka gare, eupša ga se nke A mo thibela, O mo dumeletše go ya pele thwi, gobane O tsebile se A bego a eya go mo direla.

24 Bjale, godimo ga disakatuku tše, ge re ka direga go foša sakatuku sa gago ka kopanong ye, gobaneng, o no re ngwalela ka Jeffersonville, Indiana, gomme re tla thaba go rapelela se setee gomme ra se romela go wena. Ke mahala ka go felela.

25 Bjale, ga re ne selo go se rekiša. Gabotse, ke gomiša seo. Bašemane ba ne dipuku, le ditheipi, le diswantšho, ke a nagana, le go ya pele, ka morago ga moago. Gomme ba . . . Ke reka dipuku tšela. Ngwanešu Gordon Lindsay o gatiša dipuku tšela, gomme ke di reka bakeng sa disente tše masomenne bonnyane go feta ke swanetšego go di rekiša, morago ke di patelela go fetišwa. Le tseba se o se dirago? Ga o dire selo, o a loba ka tšona. Ke Molaetša. Gomme diswantšho, ke a nagana di no ba e ka ba, ditshenyegelo go di romela di nyakile . . . Ga re nyake go dira selo. Ga se ra tla le selo ka lefaseng le, ke nnete ga re tšee selo. Se re lekago go se dira . . . Ebile ke be nka se dumelele dipuku tšela go ba fale, goba dilo tšeo, ge ke be ke sa nagane e be e tla le thuša ka tsela ye nngwe. Le a bona?

26 Gomme ke boditše bašemane ge . . . Ke sepeletše go boemapuku, ka ema go dikologa, ka šetša metsotso e se

mekae go bona papa wa kgale a etla godimo, gomme a re, “Puku yela ke bokae?”

“Ke disente tše masometlhano.”

Gomme o be a tla obeletša fase, “Ke no ba le . . .”

<sup>27</sup> Mo feng yona, go le bjalo, e tlogeleng e ye. Le a bona? Mang kapa mang yo a sa kgonego go e fihlelela, le e ka ba eng boka yeo, motho tsoko wa go šokiša, ba dumeleleng ba be le yona. Yeo ke nnete. E tla tla ka tsela tsoko ye nngwe, felotsoko. Gomme kafao, ka mehla go dirile, gomme ka mehla go tla ba ge o ka no bea Modimo pele, ke phetho, bea Modimo pele.

<sup>28</sup> Gomme bjale, ke tšwelapele ke šeditše sešupanako sela fale, gomme ke lemoga gore ga re nyake go dula fa botelele go feta re swanetše, gobane gosasa le swanetše go ya mošomong, gomme ke ne maikutlo bakeng sa seo. Gomme ke lekile bošego bjo bongwe le bjo bongwe go tšwela ntle ka seripagare sa ya senyane ge go kgonega.

<sup>29</sup> Kafao, pele re eya kgojana, gomme ke bala Lentšu, a re inamišeng dihlogo tša rena gomme re bolele le Mongwadi wa Lentšu. A go ne e ka ba mang a ka ratago go gopolwa ka thapelong? E no phagamiša seatla sa gago, bolela e ka ba eng tlhoko ya gago e lego. E no lebelela go kgabaganya batheeletši bale.

<sup>30</sup> Morena, Tate wa Mogau, seo se no, se sengwe se tsikinya pelo ya ka ge ke bona banna le basadi, bašemane le basetsana, ba phagamišetša diatla tša bona go Modimo wa Legodimo ka kgopelo. Gomme ke na le nnete gore ge—ge nna, modiradibe yo a phološitšwego ka mogau, ge go ka—ge go ka ntitia ka tsela ye go dirago, go dira eng go yo boleta, wa kgaogelo, Tate wa Legodimong ge A bona bana ba Gagwe ba phagamiša diatla tša bona? Modimo mohlokamagomo o tseba tlwa se seatla se sengwe le se sengwe se se emetšego. Gomme ke rapela Wena, Tate, go ba fa go ya ka ditlhologelo tša bona, a nke e fiwe ka botlalo.

<sup>31</sup> Gomme re rapelela bohle bao ba babjago le go tlaišwa, mogohle, megala e a tsena go ya dikgolegong, go ya dipetlele, gomme, O Morena, e tla ba go se fele. Gomme re a rapela bjalo ka kereke bošegong bjo, gore O tla gopola yo mongwe le yo mongwe wa bona, gomme wa fodiša mebele ya bona ya go babja, le go ba hlakodiša go tšwa go ditlaišego tša bona, wa rakela lenaba la soulo ya bona morago, wa tloša gosedumele go bona, gomme a nke ba hlakodišwe ka botlalo ke maatla a Jesu Kriste.

<sup>32</sup> Re tla kgopela bošegong bjo, Morena, gore O tla šegofatša kereke ye nngwe le ye nngwe yeo e emetšwego fa, moleloko yo mongwe le yo mongwe wa kereke. A nke Moya wa Gago o re etepele le go re hlahlalela ka go thato ya Gago bakeng sa maphelo a rena, le kereke e ka ba efe re lego ba yona. Re tla kgopela, Morena, gore O tla tšhollela ka boswa bošegong bjo godimo ga phuthego ya Gago fa, Moya wo Mokgethwa. A nke A tle

ka maatla a mabjalo, go fihla go tla ba tlotšo ya moswananoši e ratha yo mongwe le yo mongwe, gore badiradibe ba ke ba kitimele aletareng ba lla, gomme bakgethwa ba hlalala, gomme balwetši ba fola, dihlotša di taboga bjalo ka tshepetona. E fe, Morena, bakeng sa letago la Gago.

<sup>33</sup> A nke re ele hloko go se re šetšego re se kwele ka go dikoša tše tša go ikgetha kudu tša Tsione, bjalo ka ge khwaere ye nnyane e be e le fa go re opelela nakwana ya go feta. Oo, re Go leboga bjang bakeng sa batho ba baswa ba, ba gafetše maphelo a bona go tirelo ya Morena Jesu, gomme ditalente tša bona ba di šomišetša letago la Gawe! Re a rapela gore O tla ba šegofatša, le bona, le go ba okeletša ka go tšohle tšeo ba di dirago.

<sup>34</sup> Bjale šegofatša palo ya Lentšu la Gago, gomme a nke Moya wo Mokgethwa o tšee Lentšu le lengwe le le lengwe gomme o Le nweletša botebong ka pelong ya bao O ba kgethilego go Le amogela bošegong bjo. Uta seboledi, O Morena, ka morago ga sefapano, a nke re se bone selo eupša Morena Jesu le dibakabotse go thopela disoulo go Yena.

<sup>35</sup> Ka gona ge mothalo wa thapelo o thoma, a nke go se be le yo motee a kgabaganyago sefala se, eupša yo a tla thakgafatšwago ka go felela, goba yo motee e ka ba kae ka moagong. A nke go be le tšhologo ye bjalo ya Moya wo Mokgethwa, tlotšo ye bjalo, go fihla bohle ba tla fodišwa. Gosasa a nke megala e be go lla go kgabaganya naga, batho bao ba tla bago fa ka ditulong tša bagolofadi, goba dikhote, goba balwetši le batlaišwa, a nke ba be ba leletša mogohle go balwetši, “Etlang ka pela gomme le amogeleng phodišo ya lena.”

<sup>36</sup> E fe, Morena. Re kgopela sohle se bakeng sa letago la Gago. Leineng la Ngwana morategi wa Gago Mong, Mophološi wa rena, Morena Jesu Kriste. Amene.

<sup>37</sup> Ke nyaka lena bošegong bjo, bao le balago le nna ka Lengwalong, goba go le boloka le marakilwe, ke nyaka le phetle le nna go Mokgethwa Luka tema ya 1, gomme re ya go thoma go temana ya 36 le go bala karolo ya Lengwalo le.

<sup>38</sup> Le a tseba, ke rata go le bona le etla le Dibeibele tša lena kerekeng, go na le se sengwe ka yona gore ke no rata go phathekga Lentšu.

<sup>39</sup> Ke be ke nagana ka ngwanešu wa ka wa lekhalate a dutšego fa, yoo ke modiša wa sehlopha sela se sekaone sa baopedi. Ngwanešu wa lekhalate tlase ka borwa nako ye nngwe, ba rile o be a phathekgile Beibele, gomme ebile o be a sa kgone go bala lentšu le tee, gomme ba mmotšiša, ba re, “Gobaneng o phathekgile Beibele ye?”

O rile, “Ke a E phathekga gobane ke a E dumela.” Leo ke leswao le lebotse.

O rile, “Gabotse gona, o tseba bjang se E se bolelago?”

40 O re, “Ke kgona go kwa ba bangwe ba E bala.” Gomme o rile, “Ke dumela Lentšu le lengwe le le lengwe ka go Yona go tloga *sekwakweng* go ya *sekwakweng*.” Gomme o rile, “Ke dumela le *sekwakwa* gape gobane se ne *Beibele ye Kgethwa* e ngwadilwe godimo ga sona.”

O rile, “A o dumela tšohle tšeo di ngwadilwego ka go Yona?”

O rile, “Ke dumela se sengwe le se sengwe seo se ngwadilwego ka go Yona.” Gomme o rile, “E ka ba eng Morena a tla mpotšago go e dira, ke tla e dira.”

O rile, “Bjale, Mose, o tseba bokaonana go feta seo.” O rile, “Go ka reng ge Morena a ka go botša go taboga go kgabola leboto lela la letlapa, a o tla taboga?”

O rile, “Ee, mohlomphegi, ke tla dira.”

O rile, “O ya go kgabola bjang leboto lela la letlapa, Mose?”

41 O rile, “Gabotse, ge Morena a mpoditše go taboga, O tla ba le lešoba kua ge ke fihla kua.” Kafao seo e no ba ka ga yona. Ge Morena a mmoditše go taboga, O tla ba le molete nako le ye a fihla fale. Seo ke therešo bjang!

42 A re baleng bjale go tloga go temana ya 36 ya Mokgethwa Luka:

*Gomme, bona, motswalago Elisabetha, le yena o imile morwa botšofadi bja gagwe: gomme ye ke kgwedi ya boselela le yena, yo a bego e bitšwa moopa.*

*Ka gore le Modimo ga go selo se ka se kgonegego.*

*Gomme Maria o rile, Bona molata wa Morena; a go be go nna go ya ka lentšu la gago. Gomme morongwa o tlogile go yena.*

43 E swanetše go ba e bile . . . Letšatši le be le no hlaba, gomme le be le hlatlogela godimo ka go mafaufau a go kganya a Judea, ge le be le bonagatša go phatsima ga lona godimo ga Galelia, ge mothepana yo monnyane a be a dira tsela ya gagwe go theoga mokgotha. O be a na le moeta ka tlase ga letsogo la gagwe, e swanetše go ba e bile Mošupologo, feela ka morago ga Sabatha, gomme o be a le tseleng ya gagwe go ya sedibeng sa bohle go ga kabo ya meetse ya gagwe ya letšatši. Gomme yena, ge re mo lebelela bošegong bjo, o sepela ka hlogo ya gagwe fase, o be a sa gagolo go feta ngwana, a ka ba bogolo bja mengwaga ye lesomeseswai, gomme o bonagetše a ithuta ka go go ithuta ga go teba.

44 O be a beeleditšwe go lesogana ka leina la Josefa. O be a le mmetli, gomme o be a aga, ka nako ye, ntlo ye nnyane ye e bego e swanetše go ba le šedi ya go ikgetha, gobane yena le mogatšagwe wa go ratega, yo monnyane, Maria, ba be ba swanetše go phela ka ntlong ye, gomme e be e swanetše go ba le se sengwe le se sengwe feela go ikgetha. Letšatši ka letšatši, o be a tla tla godimo ge a be

a eja matena a gagwe ka iri ya sekgalela gomme o be a tla bolela le yena, le ka fao ba bego ba tla lebelela godimo ga dipolane tša ntlo, le ka fao mejako ye mennyane e bego e swanetše go bewa ka gare, gomme e be e swanetše go ba ntlo ya go ikgetha.

<sup>45</sup> Gomme go tloga moo Maria a bego a dula, a re re e be e no ba go kgabaganya patoga ya thaba, go kgabola moedi gomme godimo ka godimo ga thaba. Gomme ka Lamorena morago ga ditirelo, gobaneng, ba be ba tla dula ntle mathuding a ka pele morago ga ge ba jele matena a bona, gomme ba be aa tla lebelela go kgabaganya godimo ga thaba ye nngwe go sehlopha se sennyane sa mehlakamotala gomme tšhebele ye nnyane ya ntlo e hlabile, ba be ba tla beakanya bokamoso bja bona bja se ba bego ba eya go se dira.

<sup>46</sup> Lamorena pele e bile Lamorena la go se tlwaelege ka sinagogeng ka Nasaretha. Rabi wa go loka o rerile thero ye maatla, gomme o boletše ka Modimo yo mogolo wa Abraham, ka fao gore mo matšatšing a go etela ga Gagwe bana ba Gagwe tlase ka Egepeta, ka fao gore O ba ntšhitše ka seatla se maatla, ka fao A laeditšego ka Boyena go ba Mmuši wa mmogo Magodimo le lefase, ka fao gore meetse ga se a kgone go ema tseleng ya Gagwe, goba ga go selo se bego se ka kgona go šitiša thato Kgethwa ya Gagwe, ka fao gore O fafaditše ka diatla tša Gagwe Mong borotho godimo ga mobu bošego go fepa bana ba Gagwe ba bego ba se ne borotho.

<sup>47</sup> Gomme o šupile gape go nako yeo ba feletšwego ke nama, gomme Morena Modimo Jehofa o hlotše phefo ye kgolo go foka, gomme dikhwiri di tlile ka dikete ka kampeng, gomme MoIsraele yo mongwe le yo mongwe, ntle le go šomiša e ka ba eng go feta diatla tša bona, ba swere dikhwiri le go di hloba, gomme ba jele tšohle ba bego ba di nyaka.

<sup>48</sup> Gomme go bile mo ntlheng ye moo Josefa a swanetšego go be a rile, “A o lemogile, Morategi, go tla tšea dikhwiri tše kae go fepa bona batho?”

<sup>49</sup> Ka gore go be go le e ka ba milione tše pedi le seripa tša batho ka kampeng yela, gomme motho yo mongwe le yo mongwe o be a ka go ja dikhwiri tše pedi goba go feta ga bonolo, bakeng sa go khora, kafao go be go tla tšea bontši go feta dikhwiri tše milione tše tlhano. Eupša Yena ke Jehofa, Mohlodi, ka fao gore O kgonne go hlola sekhwiri! Go molaleng go be go se khwiri tše milione tše tlhano ka Palestina yohle, goba lešokeng lohle, eupša Yena ke Jehofa Modimo Yo a ka kgonago go di bea kua. Ge go se selo kua O sa ntše a ka kgona go no di hlola, ka gore O e dirile ka matšatšing a Abraham godimo ga thaba moo Abraham a Mmiditšego Jehofa-Jireh, “Morena o tla fa e ka ba eng A e hlokago.”

<sup>50</sup> Nako yeo Josefa o swanetše go be a boletše se sengwe boka se: “Molaetša o be o tsenelela, eupša ke naganne rabi wa go loka

o o sentše mo bofelong ge a rile, ‘Eupša ke therešo gore Jehofa o be a fela a dira mehlolo, eupša mmalo, Jehofa ebile ga a dire mehlolo lehono, gore matsatši ao a fetile kgale. Sohle Jehofa a nyakago re se dira ke go ya kerekeng, le go lefa ditshwanelo tša rena, le go no phela bophelo bjo bobotse, bja go itekanela.’”

51 Josefa a ka no ba a rile, “Ke mohuta wa go se dumelelane le rabi, gobane ge A le Modimo, O swanetše go dula a le Modimo wa go swana; ge A be a le Jehofa-Jireh, a kgonne go ba fa, A ka kgona go re fa, le rena.”

52 Ke be ke tla rata gakaakang go goeela, “Amene,” go Josefa!

53 Maria o ngwegela morago ka ntlong, gomme o topa Sekrolo, gomme o Se tliša ntle, bjalo ka ya bona, ka mehla, Lamorena morago ga sekgalela ke go ithuta Beibele. Gomme go diregile go ba letšatši le, re tla bolela, gore o tlišitše Sekrolo sa Jesaya. Gomme ge Josefa a tšere Sekrolo gomme a Se bula, a thoma go balela Maria Sekrolo, le go swaya. Mafelelong, o tla go lefelo la Jesaya 9:6, moo e bolelago se sengwe boka se: “Re neilwe Ngwana, go rena Morwa: gomme mmušo o tla ba godimo ga magetla a Gagwe: gomme Leina la Gagwe le tla bitšwa Moeletši, Mokgoma wa Khutšo, Modimo yo maatla, Tate wa gosafelego.”

54 Gomme ge a be a sa bala, o kwele mohemo, gomme o lebeletše ka mathoko, gomme mohumagadi yo monnyane, moratiwa wa gagwe, sefahlego sa gagwe se sennyane se phadimile, gomme mahlo a gagwe a be a phatsima boka dinaledi bošegong bja leswiswi, gomme o rile, “Bala yeo gape, Morategi.” Gomme o e badile gape, gomme o swanetše go be a rile, “Oo, yoo e tla ba Mang? Moprofeta o bolela ka mang?”

55 Gomme o boletše se sengwe boka se, goba a ka be a rile: “Moprofeta o be a bolela ka Mesia yo a tla tlogo. Gomme yo mongwe wa basadi ba rena letšatši le lengwe o tla belega Mesia.” Lengwalo lela le bonagetše le tlimarela kgarebe ye nnyane, o be a no se kgone go tloga go Lona.

56 Seo ke se a bego a ithuta ka sona, mohlomongwe, mosong wo moo re mo hwetšago a eya sedibeng go ga meetse. Mohlomongwe ke be ke tla re e be e le Mošupologo, e be e le letšatši la go hlatswa, gomme o be a swanetše go ya go ga meetse a go hlatswa ka pela, mmagwe o be a tšofetše.

57 Gomme ge a be a nagana ka Lengwalo lela, “Re tswaletšwe Ngwana, re neilwe Morwa, gomme Leina la Gagwe le tla bitšwa Moeletši, Mokgoma wa Khutšo, Modimo yo maatla, Tate wa gosafelego,” o bile le kgahlego kudu ka go se a bego a se bolela, goba a se nagana, go fihla a nyakile go lebala go retologa khona.

58 Gomme ge a phagamišitše hlogo ya gagwe, go be go le se sengwe sa go tlabala, go bonala eke Seetša se phadimile. Gomme o retologela tlase go leba go sekwere sa toropokgolo moo sediba sa kgarebe se emego le bjale lehono. Gomme o swanetše go be a naganne, “Oo, letšatši le pekentše godimo ga phoka tsoko ye

e šetšego godimo ka lehlakoreng la thaba, goba le ka no ba le bethile seripa sa metale wa go pholetšhwa felotsoko, goba tlhamo go tšwa go lešole la Moroma, seo mohlomongwe ke se ke se bonego se pekenya pele ga mahlo a ka.” Kafao o ya pele a lora.

<sup>59</sup> Oo, go befile kudu gore kereke lehono ga e sepele ka Moyeng ka mokgwa woo go feta ka mo re dirago. Ka gore ke mohuta woo wa nako yeo ge Modimo a etla go wena. Le a tseba, e be e le tseleng go ya Emause ge Kleopa le mogwera wa gagwe ba be ba bolela, le go hlamula, gomme ba nagana ka Jesu ke moo A sepeletšego ka ntle ga dithokgwa lehlakoreng la bona le go sepela le bona. Ke ge re sa nagana ka Yena. Bothata ka lefase lehono, re nagana ka se sengwe le se sengwe gape eupša Yena, morago re makala gobaneng re sa hwetše ditšhegofatšo.

<sup>60</sup> E be e no ba dibeke di se kae tša go feta, e ka ba dibeke tše tharo tša go feta, mola ke dutše fase kgauswi le mehlare tsoko ya mosikamoro, bjalo ka ge ke be ke le botša, gomme ka thoma go nagana, e bile fao lekga la mathomo A tlilego gomme a bega bodiredi bjo boswa go nna. Naganang ka Yena. “Batamelang kgauswi go Nna, gomme Ke tla batamela kgauswi go lena,” go boletše Morena. Naganang ka Yena.

<sup>61</sup> Dafida o boletše gore o be a...ngwala melao ya Gagwe godimo ga kota ya malao, gomme o naganiše ka yona mosegare le bošego. Seo ke se kereke e swanetšego go se dira, e tla ba go boloka pelo ya gago e beakanyeditšwe Modimo mosegare le bošego, ka gore ke nako ye A tšwelelago.

<sup>62</sup> Salomo o rile, “Bjalo ka ge motho a nagana ka pelong ya gagwe, o bjalo.” Thoma go nagana gore o yo mongwe wa bana ba Gagwe, gore O go phološitše, gomme O go loketše, gomme o a Mo rata, gomme O a go rata. O se ke wa no leta go fihla o eya kerekeng, goba iri ye nngwe ya maleba, e no Mmea monaganong wa gago nako yohle.

<sup>63</sup> Gomme ge a be a eya pele a sepela go theoga mokgotha, go be go sešo gwa ba motho mokgotheng, gomme ge a be a sepela go bapa le tsela ye nnyane ya lerole bakeng sa tsejana ya ka thoko, ka pelapela, o thomile go lemoga gore go be go le se sengwe go mo dikologa, maikutlo a go se tlwaelege ka kgonthe.

<sup>64</sup> Oo, bjoo ke boitemogelo bja go makatša kudukudu! Ke a tshepa gore yo mongwe le yo mongwe mo o itemogetše yona mehuta ya dinako. Ge o se wa dira, bjo e tla ba bošego bjo bobotse go thoma. E no thoma go nagana ka Yena, gomme o Mo rapele ka pelong ya gago, gomme ka pelapela, o tla ikwela kopanelo ya kgauswi ya Moya wo Mokgethwa gohle go go dikologa. Gomme o tlotšwa kudu, go fihla o sa kgone go e swara botelele bjo bo itšego, o tla phagamišetša diatla tša gago godimo, gomme, goba wa dira se sengwe, o no se kgone go ema go iketla ge O etla.

<sup>65</sup> Ge a be a nagana, a sa lemoge ke mang a bego a le tikologong ya gagwe, mohumagadi yo monnyane mohlomongwe ka para

ya diramphašane godimo ga maoto a gagwe, a sepela go bapa tseleng ye nnyane ye ya lerole, eupša a nagana ka Morena le ditshepišo tša Gagwe tša—tša dilo tše di tlogo, gomme ge a be a sa nagana, ka pelapela maikutlo ao a bile a magolo kudu go mo dikologa go fihla a no phagamišetša hlogo ya gagwe godimo, gomme ge a dirile, pele ga gagwe go be go eme Seetša, gomme hleng le Seetša sela go be go le Gabariele Morongwa, Morongwamogolo wa Modimo.

66 Ge o nyaka Barongwa go tšwelela go wena, bea monagano wa gago go Modimo, gomme go tloga go dilo tša lefase. Dira mošomo wa gago, eya kerekeng ya geno, eya go hlatswa dibjana tša gago, e ka ba kae o lego, bea monagano wa gago go Yena mosegare ohle le bošego bjohle botelele, gona Modimo o tla dira se sengwe. O batamela kgauswi le Yena, o na le lefase le tswaleletšwe ntle, feela wena le Yena le mmogo.

67 Go tšwelela mo ga Morongwa go tšhošitše kgarebe ye nnyane, o be a rutilwe gore matšatši a mehlolo a be a fetile, eupša o be a bone se sengwe se direga.

68 Morongwa o mmoditše, o rile, “Dumela, Maria.” *Dumela* go ra, “go ema.” Gomme O bile le Molaetša bakeng sa gagwe.

69 Ge Morongwa a etla, O na le Molaetša bakeng sa gago. Gomme Moya wo Mokgethwa, Morongwa wa Modimo o fa bošegong bjo ka Molaetša bakeng sa modumedi yo mongwe le yo mongwe. E no Mmea monaganong wa gago, tšwela pele o nagana ka Yena, ka fao A ratega ka gona, ka fao A lego bose ka gona, ka ditshepišo tša Gagwe. Ge o babja, bea se monaganong wa gago: “O gobaditšwe ka baka la dikarogo tša ka, O tlapirigantšwe ka baka la bokgopo bja ka: kotlo ya khutšo ya ka e be e le godimo ga Gagwe; gomme ka megogoma ya Gagwe ke fodišitšwe.” Boloka monagano wa gago o beilwe bogareng ka mokgwa woo, se sengwe se tla direga go wena, ka pelapela go tla ba se sengwe se batamelago kgauswi le wena, tlotšo e tla tla godimo ga gago gomme o tla tšwela ka ntle ga setulo seo. “Batamelang kgauswi go Morena, gomme O tla batamela kgauswi go lena.”

70 Gomme o lebeletše Morongwa yo mogolo yo, gomme Leina la Gagwe ke Gabariele. Bjale, go na le Barongwa ba Morena, ba bantši ba bona, gomme ba tla lefaseng le go tliša Melaetša, eupša Gabariele, ge A etla, go ne se sengwe se segolo se yago go direga. O bile Yena Yo a kwalakwaditšego go Tla ga pele ga Kriste, O tla ba Yena yoo a tla tsebišago go Tla la bobedi ga Kriste.

71 Gomme O boditše Maria, “O hweditše go gaogelwa ke Modimo.” A Molaetša go o tliša go yena! “O hweditše go gaogelwa ke Modimo.” Gomme ge a be a sa nagana ka Lengwalo lela, gona leo e be e le Lengwalo leo le tiišeditšwego go yena.

72 Bjale, ge o babja, nagana ka Lengwalo lela; ge o lahlegile, nagana ka Lengwalo lela; ge o nyaka Moya wo Mokgethwa,

nagana ka Lengwalo lela, gomme Moya wo Mokgethwa o tla Le tiišetša go wena.

<sup>73</sup> O be a le fale, gomme Morongwa o rile, o mmoditše gore o be a eya go ba le Morwa, gomme ba be ba tla bitša Leina la Gagwe Jesu; O be a tla phološa batho go tšwa dibeng tša bona. Gomme O rile, “Motswalago Elisabetha ke mokgekolo, gomme ke dikgwedi tše tshela le yena bjale bjalo ka mme, yo a bego a bitšwa moopa.” Bjale, Maria le Elisabetha ba be ba le bomotswala ba pele, Morena wa rena le Johane Mokolobetši e be e le bomotswala ba bobedi.

<sup>74</sup> Leina la mogatša wa Elisabetha e be e le Sakaria. O be a le monna wa moloki, moprista ka tempeleng, o be a le monna wa go loka. Gomme bophelo bjohle bja gagwe bjo a nyalanego le Elisabetha, o be a rapetše gomme a swareletše go Modimo, gore Modimo o be a tla ba fa lesea, eupša mosadi o be a le moopa. Gomme o be a le bogolo bja mengwaga ye masometshela, gomme Sakaria o be a le tsela ka go masomešupa, gomme go le bjalo ba be ba se na le bana. Kafao Sakaria o ile godimo moketeng go dira mošomo wa gagwe moketeng, e bego e le go tšhuma diorelo ge batho ba be ba rapela ka phuthegong. Gomme ge a be a sa le ka kua a tšhuma diorelo, o lebeletše, go emeng ka seatleng se setona sa aletara, gomme fao go be go eme Gabariele Morongwamogolo.

<sup>75</sup> Phela gabotse, dira gabotse, Barongwa ba sa phela, Modimo o sa na le bona ka taelong ya Gagwe. Gabariele o be a eme kua, Morongwamogolo, gomme a mmotša se se bego se eya go direga. Ka morago ga matšatši a a bodiredi bja gagwe ka te—te tempeleng, o be a tla ya gae, gomme mogatšagwe o be a eya go ima gomme a belege ngwana. Ba biditše leina la gagwe Johane. Gomme re tseba kanegelo.

<sup>76</sup> Bjale, Morongwa Gabariele, dikgwedi tše tshela moragwana, o etetše Maria le go mmotša gore motswalagwe o be a eya go ba le lesea, le yena. Kafao, Maria o tsebile gore woo e be e tla ba mohlolo, wa mokgekolo yola, a tšofetše kudu ka mengwaga go ba le lesea. Eupša o rile go Morongwa, “Go tla ba bjang ka nna, go boneng gore ga ke tsebe monna?” Gomme kgopelang gomme le tla amogela.

<sup>77</sup> O rile, “Moya wo Mokgethwa o ya go go okamela wa moriti. Selo se Sekgethwa sela se tla tswalwago ke wena se tla bitšwa Morwa wa Modimo. Ke ka mokgwa wo se yago go direga.”

<sup>78</sup> Maria ga se nke a bolela morago go Morongwa, ga se nke a e ahlaahla ka tsela e ka ba efe. Selo se nnoši a se boletšego e bile, “Bonang molata wa Morena; a go be go nna go ya ka Lentšu la Gago.”

<sup>79</sup> A le naganne e bile le moprista Sakaria o botšišitše, yena go beng mokgalabje gomme mosadi mokgekolo, le yena, ka mokgwa wo se se bego se tla dirwa? Gomme moprista yo a bego a swanetšego go tseba Lentšu le go tseba se Modimo a se dirilego.

Eupša kgarebe ye nnyane ye e be e no ba ngwana, gomme o be a se na le mogatša, o be a swanetše go dumela disekgonege, se sengwe seo se bego se se sa ke sa direga pele. Eupša ga se nke a ngangišana, ga se nke a botšišolla gape, Lentšu la gagwe le be le lekanetše go yena.

<sup>80</sup> Oo, ge Kereke e ka no ba ka mokgwa woo! Lentšu le a e ruma. Ge Modimo a boletše bjalo, seo ke sohle re hlokago go se tseba. Go ya go ba bjang, nka se kgone go le botša, eupša ge Modimo a boletše bjalo, go ya go ba ka tsela yeo, gobane Modimo o boletše bjalo. Oo, seo ke se ke nyakago Kereke e se tseba. Ge go na le e ka ba eng ke nyakago le nweletša tumelo ka go sona, ke ka go se Modimo a se boletšego, se swanetše go ba therešo.

<sup>81</sup> A le etše hloko o ile a swanela go dumela disekgonege? O be a ka se kgone go ya morago boka Sakaria a dirile, a ka be a ile morago go Sarah, gomme Sarah o be a nyakile go ba lekgolo ge a bile le lesea; gomme Hanna ka tempeleng, o be a le mokgekolo, le yena. Gomme ba bile le mehlala ye mentši ya seo, moo ba bilego le bagatša, eupša Maria o ile a swanela go dumela se sengwe seo se se go sa ke sa direga.

<sup>82</sup> Le na le mehlala ye dikete ya phodišo Kgethwa. Lebelelang batho ba ba fodišitšwego ka kankere, bofofu, bomuma, bofoa, mehuta yohle ya malwetši le mekomane. Re na le bontši bja yeo go e lebelela bjalo ka mohlala, eupša mosetsana yo monnyane yo o be a se ne selo eupša feela Lentšu la gagwe, gomme leo le be le lekanetše, Lentšu la gagwe le be le lokile go lekanela go yena.

<sup>83</sup> Gomme ke nyaka le ele hloko, ga se a leta go fihla a be a ne kgonthe e be e eya go direga, o thomile go paka ka yona gonabjale. Ga se a leta go fihla a ikwetše bophelo, gore a kgone go ba phosithifi o be a eya go ba le lesea, feela ka pela ge a kwele Lentšu la gagwe, o mo tšere Lentšung la gagwe, gomme o thomile go paka le go tumiša Modimo bakeng sa lesea pele a ikwela e ka ba eng. Yeo ke . . .

<sup>84</sup> Re fe boMaria ba bantši go dikologa fa bao ba ka kgonago go tšea Modimo Lentšung la Gagwe le go Mo tumiša, ge eba o ikwela e ka ba eng goba aowa. Mo tšee Lentšung la Gagwe! Modimo o leka go hwetša yo mongwe yo a tla tšeago Lentšu la Gagwe. Ga ke kgathale gore o ikwa bjang.

<sup>85</sup> Yo mongwe o re, “Gabotse, ga ke ikwele bokaonana e ka ba bofe. Ke be ke le, ke ile dikopanong, ke rapeletšwe. Ke . . .”

<sup>86</sup> Seo ga se ne selo go dira le yona, Modimo o boletše bjalo, gomme seo se a e ruma. Amene. Yo mongwe yo a tla tšeago Lentšu la Gagwe, seo ke se se Mo kgahlago. Dumela Lentšu la Gagwe, seo ke se se thabišago Modimo, yeo ke tsela e nnoši o ka tsogego wa hwetša go gaogerlwa ke Yena, ke go dumela Lentšu la Gagwe.

<sup>87</sup> Gomme Maria o Mo tšere Lentšung la Gagwe, o rile, “Leo le ntekane.” Gomme o ile go dikologa a botša yo mongwe le yo mongwe o be a eya go ba le lesea le pele a eba le leswao le tee la

yona le gatee, leswao le tee la e ka ba eng. O sa, o tsebile gore e be e eya go direga gobane Modimo o boletše bjalo.

<sup>88</sup> A ga le bone, Peu ya therešo ya Abraham? Ge Modimo a bolela, ba a e dumela. Ke ka baka leo ke ratago kereke lehono ye e ka kgonago go tšea Lentšu la Modimo.

<sup>89</sup> Ge Modimo a re, “Jesu Kriste o a swana maabane, lehono, le go ya go ile.”

Kereke e re, “Amen.”

<sup>90</sup> Ge Jesu a rile, “Mediro ye Ke e dirago, le tla e dira le lena.”

Kereke e re, “Amen.”

<sup>91</sup> Jesu o rile, “Maswao a a tla latela bona ba ba dumelago: Ka Leina la Ka ba tla lelekela bodiabolo ntle, ba bolela ka maleme a maswa; ba swara disephente, ba nwa dilo tše di bolayago; ba bea diatla go balwetši, ba tla welwa ke maruru.”

Kereke e re, “Amen.”

<sup>92</sup> Ga ba tshwenyega ka yona, ba makala e ya go direga bjang, ba no Mo tšea Lentšung la Gagwe gomme ba ya pele. Yeo ke Peu ya therešo ya Abraham, bao ke bana ba Modimo.

<sup>93</sup> Maria o ile a swanelwa ke go dumela disekgonege. Eupša Modimo o tšea disekgonege gomme a di dira tša kgonthe ge la Gagwe. . . A tšerwe Lentšung la Gagwe. Ngaka a ka no ba a rile, “O ka se tsoge wa fediša kankere yeo.” Ngaka a ka no ba a rile, “O ka se tsoge wa kgona go sepela gape. Gabotse, ga—gabtse, ga go kgonege go wena go e dira.” Eupša disekgonege di timelela ntle ge Modimo a tšewa Lentšung la Gagwe, ga go kgathale se ngaka a se bolelago, o dira bokaonekaone a kgonago, eupša Modimo ke Modimo, amene, gomme Lentšu la Gagwe le no ba boka A le. O tšea Lentšu la Gagwe, seo se a e ruma neng le neng. “Ge o ka kgona go dumela, wa re go thaba ye, ‘Šuthišwa,’ gomme wa se belaele pelong ya gago, eupša o tla dumela gore se o se boletšego se tla direga, o ka ba le se o se boletšego.” Modimo o tšerwe Lentšung la Gagwe!

<sup>94</sup> Oo, o thomile thwi go tloga a efa tumišo go Modimo, le go botša batho gore o be a eya go ba le lese a sa tsebe monna. Bjale, elelwang, o be a itahletše yenamong ka leemong la, goba, go lebana le tshwaswalatšo, eupša Maria ga se a ema go nagana ka tshwaswalatšo, ga se a kgathale ka tshwaswalatšo.

<sup>95</sup> Ge motho a etla go hwetša Moya wo Mokgethwa, ga o kgathale se baagišani ba yago go se bolela, ga o kgathale ge eba o a goelesa, o bolela ka maleme, goba e ka ba eng o e dirago, e fetile seo, o tšere Modimo Lentšung la Gagwe, ga o tshwenyega ka tshwaswalatšo. O lahlegetšwe ke ohle a gago a madirwa ke diabolo, a madirwagae, a bohlale, a go bitšwa maemo ke sosaete, selo se o se nyakago ke go ratwa ke Modimo.

96 Ga o kgathale se Moya wo Mokgethwa o go dirago go se dira, go goelela, go goeletša, goba go lla, goba go sehumola, goba e ka ba eng o nyakago go e dira, e ka ba eng Moya wo Mokgethwa o e beago go wena, o a e dira gobane ga o kgathale, o lahlegetšwe ke dilo tšohle tšela tša madirwakemotho, o lokologile ka go Kriste Jesu, Moya wa Modimo o go lokolotše. Gomme o lokologile ka maatleng a Modimo, o hlapa ka bobotseng bja Gagwe, o Mo rapela ka Moya le ka therešo. O motho wa go lokologa, o tšere Lentšu la Modimo, le swareletše ka pelong ya gago. Ga o kgathale, wena o, itahlela wenamong. . .

97 O re, “Gabotse, ge ke—ke tlabe ke eme mošomong wa ka letšatši le lengwe gomme molaodi a re, ‘E re, ke kwele o be o le godimo kua ka kopanong yela ya mopshikologimokgethwa gomme wa fodišwa.’ Ke a boifa.”

98 Aowa, ga o dire. Ngwanešu, ge o le Peu ya Abraham, o e tšea go ba thabo go ema gomme wa paka ka maatla a tsogo ya Jesu Kriste. Nnete, o a dira. “Batho ba Ka ba ka se lewe ke hlong. Ge o lewa ke dihlong ka Nna pele ga batho, Ke tla lewa ke dihlong ka wena pele ga Tate wa Ka le Barongwa ba bakgethwa,” go boletše Morena Jesu. Kafao ga ba lewe ke hlong, ga ba boife.

99 Kafao, ka morago ga ge Maria, a kwele ditaba tše botse ka Elisabetha, oo, o be a nyaka go abelana ditaba. Le a tseba go na le se sengwe ka se, gore ge ka kgonthe o tšea Modimo mo tšhepišong ya Gagwe gomme wa Mmona a e phethagatša, o nyaka go botša yo mongwe gape ka yona, o no se kgone go dula go iketla, o swanetše go dira se sengwe ka yona. Kafao, o tlogeletše, mosadi yola yo monnyane, a nnoši, godimo go bapa le noka le godimo ga, godimo ga dithaba go ya ka Judea, go ya ka go nagaselegae ya thaba.

100 Bjale, Elisabetha, ka pela ge a hweditše gore o be a eya go ba mme, o be a ikutile yenamong, o ile morago ka kamoreng, gomme ke a eleletša, a re nong go nagana o dutše morago kua o dira diputsu tše nnyane, le go lokiša mošomo ohle wa gagwe wo monnyane bakeng sa moisa yo monnyane yo a bego a swanetše go tla. Gomme o dira lepai le lennyane leo a yago go ba le yena a gafelwe ka go lona, le dilo tšohle tše, go lokiša dilo, gobane o be a eya go ba mme.

101 Eupša selo se be se mo tshwenya, e be e le dikgwedi tše tshela ka yena bjalo ka mme gomme lesele le be le sešo la šišinyega. Bjale, mang kapa mang o a tseba gore seo ga se sa tlwaelega, go tšwele tseleng kudu, e ka ba dikgwedi tše pedi goba tše tharo goba go feta, mohlomongwe tše nne bontši, go na le bophelo, eupša ga go bophelo le gabjale. Eupša o be a dutše morago ka kamoreng ye nnyane.

102 A re nong go lebelela bjale, re hweletšeng setulo se sennyane go bapa le lehlakore la tsela gomme re hlokomele: Mo go tla kgarebe ye nnyane go rotoga tsela, mahlo a gagwe a mannyane a

phadima, marama a gagwe feela bjalo ka mapupuresana ka mo a bego a kgona go ba, e sego ka Max Factor, aowa, aowa, eupša a goteditšwe ka maatla a Modimo le thabo ya Modimo. Feela ka maatla ka fao a kgonnego go kitima, mahlo a gagwe a manyane a phatsima, le a tseba. Gomme o . . .

<sup>103</sup> Ke bona Elisabetha a phagamišetša garetene morago le go lebelela ntle, gomme o bona mothepa a etla godimo ga dithaba tša Judea. Gomme ge o batamela kgauswi, o o lemogile go ba motswala wa gagwe, Maria. Kafao o tatetša šolo ye nnyane go mo dikologa, gomme o ya ntle go kopana le yena. Oo, o swanetše go be a fošeditše matsogo a gagwe go mo dikologa, gomme a mo gokara, le go mo atla.

<sup>104</sup> Le a tseba, batho ba be ba tlwaetše, ba hlokomelane seng sa bona, le a tseba, eupša matšatšing a bjale ga ba dire, ga ba hlokomelane seng sa bona, batho ba tonya kudu, ba katologane kudu go bona seng. Go be go tlwaelegile ge yo mongwe wa baagišani a be a babja, bohle re be re tla tsena ka gare, ra dula fase, ra ba thuša, gomme ra phapha dikgong tša bona, ra sega lehea la bona, goba go ba thuša go lema, goba e ka ba eng e bego e kगतलपाना, gomme ra ba thuša, eupša lehono, ebile ga o tsebe moagišani wa gago o hwile, ntle le ge o e bala ka pampiring. Go tonya kudu, go hloka phapano kudu.

<sup>105</sup> Hani, ga ke re se go ba yo mobe, go mogatšaka a dutšego fale, eupša letšatši le lengwe, nako ye nngwe ya go feta go bile, re be re le tlase toropong mmogo, gomme go no bonala e le setlwaedi. Gomme go be go le mo—mo mohumagadi mokgotheng, gomme o rile, “Go bjang, Kgaetšedi Branham?”

Gomme ga se ka ke ka mo kwa a bolela lentšu. Gomme ke rile, “Hani, mohumagadi yola o boletše le wena.”

O rile, “Ke boletše le yena.”

Gomme ke rile, “Ga se ke go kwe.”

O rile, “Ke myemyetše.”

<sup>106</sup> “Oo,” ke rile, “Hani, motšinyo wo monnyane wa kgale, wa bosawane ga o tšee lefelo la ye botse ‘Go bjang?’” Ke—ke—ke rata seo go ba botho, eupša motšinyo wo monnyane wa kgale, wa bosawane! Ke rata yo mongwe go bolela, e sego go fa motšinyo wo monnyane boka ophosamo, ke—ke e rata go ba kgonthe “Go bjang?” Ke rata mo go botse ga kgale, go swarana ga go šikinya seatla.

<sup>107</sup> E sego kgale kudu ke be ke le ka Florida, gomme go be go le, mosadi tsoko a bitšwago mokgomagadi, goba se sengwe, yoo—yoo a ba dumeletšego go ba le lebala tsoko moo re hlomilego tente. Gomme bošegong bjoo Ngwanešu Bosworth o rile, “Mokgomagadi.”

Ke naganne, “Bjale, ke ya go kopana le mang bjale?”

O rile, “O morago kua, o nyaka go go bona.”

Ke rile, “Gabotse, go ne batho ba bantši ba babjago ntle fa, le bona, bao ba nyakago go mpona.”

Gomme o rile, “Gabotse, ge o eya ntle e no šikinya seatla sa gagwe.”

<sup>108</sup> Gomme mosadi yola o be a na le para ya dipaketsane, gomme di be di le godimo ga lepara, mosadi yo mogologolo, gomme o be a na le dipaketsane ka diatleng tša gagwe ka mokgwa *wo*, godimo ga lepara, gomme ge ke feta kgauswi, o rile, “A o *Ngaka Branham*?”

<sup>109</sup> Ke rile, “Aowa, meme, aowa, meme, ke nna Ngwanešu Branham.” Gomme o be a na le dibenyane tša go lekanela godimo ga diatla tša gagwe, le dipenkele tša go lekanela go romela moromiwa makga a lekgolo go dikologa lefase. Gomme—gomme o . . . Gomme ke rile, “Ke nna Ngwanešu Branham.”

O obeleditše seatla sa gagwe ntle, gomme o rile, “Ke *kgahlegile* go kopana le wena.”

Ke ile ka swara seatla se segolo sela sa go nona gomme ka se gogela fase, ke rile, “Se iše tlase fa, gore ke go tsebe ge ke go bona gape.”

<sup>110</sup> Ke no hloya bontši bja maitirišo ale. Ke rena eng, go le bjalo? Kgato tše tshela tša lerole. Ke soulo ka kua ye Modimo a e lebeletšego. Dibenyane di ka se khupetše dibe, ebile le diaparo di ka se khupetše dibe, go tšea Madi a Jesu Kriste go khupetša sebe, ka gona O re dira se re lego. Ka gona ka dipelong tša rena . . .

<sup>111</sup> Maria, o swere Elisabetha, gomme Elisabetha le Maria, gomme ba lebelele ba phaphathana seng, le go gokarana seng, ba atlana seng, gomme ba thabile kudu go kopana seng sa bona. A segwera!

<sup>112</sup> Gomme ke kgona go ba bona ge mafelelong ba tlogela go gokarana seng sa bona, gomme ba swarana diatla seng sa bona, gomme ba bolela, oo, ke kgona go kwa Elisabetha a re, “Maria, ga se ka go bona lebaka la mengwaga ye mentši kudu, eupša ke kgonne go tseba wona mahlo a mabotse go tšwa go mmago, Anna. Gomme, oo, o mosetsana yo mobotse kudu. O ya bjang mmogo?”

“Oo, feela gabotse,” o a bolela. “Ke no ikwela go makatša.” Gomme o rile, “Ke be ke thabile kudu go kwa ditaba gore o be o eya go ba mme.”

“Oo,” o rile, “Yeo ke nnete. Gomme ke thabile kudu, le nna.”

O rile, Maria o rile, “Eupša o a tseba ke eng? Ke swanetše go ba mme, le nna.”

“Oo, wena le Josefa le nyalane?”

“Aowa, ebile ga ka nyalwa le gatee, gomme ke swanetše go ba mme.”

“Gabotse, ga ke kwešiše se. Bjale, o a bona, lesea la ka le fetile dikgwedi tše tshela, gomme ga se la ke la ba le bophelo le gabjale, gomme ke bile go tshwenyega gannyane.”

<sup>113</sup> Gomme Maria o rile, “Oo, se tshwenyega, gobane Morongwa wa Modimo o bonagetše go nna tlase tseleng, gomme o mpoditše ka se, o a bona, gomme ga ke tsebe monna e ka ba mang, eupša efela Moya wo Mokgethwa o nkalametše wa moriti, gomme ke ya go tšweletša Ngwana, o rile, gomme ke ya go bitša Leina la Gagwe Jesu, O tla ba Morwa wa Modimo.”

<sup>114</sup> Gomme feela ka pela ge a rile *Jesu*, Johane yo monnyane o tlile bophelong, gomme a thoma go tlola le go taboga ka lethabo feela ka maatla ka fao a bego a kgona go ya.

<sup>115</sup> Gomme Elisabetha, sefahlego sa gagwe se editše, gomme o rile, “Mmago Morena wa ka o tlile neng go mpona? Ka gore ka pela ge Leina la Gagwe le boletšwe ka ditsebeng tša ka, lesea la ka le tlotše ka popelong bakeng sa lethabo.”

<sup>116</sup> Ge Leina lela la Jesu Kriste le tlišitše bophelo go lesea le le hwilego lekga la mathomo Le kilego la bolelwa ka dipounama tša motho, Le tlišitše Bophelo bjo Bosafelego le kolobetšo ya Moya wo Mokgethwa ka popelong ya Maria, gobane Beibele e rile, goba, Elisabetha, Beibele e boletše gore Johane o tswetšwe go tšwa popelong ya mmagwe a tletše ka Moya wo Mokgethwa. . . [Ga go selo go theipi—Mor.] Oo, Le swanetše go fodiša balwetši, go thakgafatša balephera, go tsoša bahu. “Leineng la Ka ba tla lelekela bodiabolo ntle.” Haleluya! Leina lela la go makatša la Morena Jesu le robetše ka dintlheng tša menwana ya rena bošegong bjo, le robetše feela komana go Le amogela.

<sup>117</sup> Ge leo le dirile seo, gomme ke nagana se se diregilego, ke kgona go bona Moya wa Modimo o šoma gare ga bona basadi ba babedi, yo motee o profetile ka yo motee, gomme yo motee o profetile ka yo mongwe, Moya wo Mokgethwa godimo ga bona ge Leina la Jesu Kriste le beditšwe magareng ga bona.

<sup>118</sup> Oo, ngwanešu wa ka, Leina lela la go swana la Jesu Kriste ke le maatla kudu bošegong bjo, Le swanetše go ba, magareng ga batho fa bošegong bjo. Le swanetše go dira eng go monna wa go babja goba mosadi wa go babja? Le swanetše go dira eng go motho yo a tlemilwego ke diabolo, ge tshepišo ya Gagwe Mong, e kgwapareditše ka Legodimong pele ga Modimo ka Madi a Gagwe Mong go dira botse ka go Moya wo Mokgethwa fa go bontšha maswao le matete? “Leineng la Ka ba tla lelekela bodiabolo ntle; ba bea diatla godimo ga balwetši, gomme ba tla welwa ke maruru, maswao a ohle a tla latela bona bao ba dumelago.” A le a e dumela?

A re rapeleng.

<sup>119</sup> Tate wa Legodimong, dipelo tša rena di thabile kudu bošegong bjo, re no ikwela o ka re re ka kgona go tloga. Go bonala o ka re ge O ka no phagamišetša morago tlhaka ya moago wo wa

kgale re tla ya pele Gae bošegong bjo, go tsebeng gore Leina lela le legolo la Morena Jesu, Leina lela le lebotsebotse, Leina lela le bohlokwa, Leina ka godimo ga maina ohle, Leina leo se sengwe le se sengwe ka Legodimong se khunamago go lona, se sengwe le se sengwe mo lefaseng se tla khunama go Lona, O Modimo, diabololo yo mongwe le yo mongwe o tla swanela go khunama go Lona le go Le lemoga. Gomme O fa Leina leo go rena, “Kgopelang Tate eng kapa eng Leineng la Ka, Ke tla e dira.”

<sup>120</sup> O Morena Modimo, Yo a dirilego tshepišo ka Morwa wa Gago Jesu, a nke Leina la Jesu Kriste, bošegong bjo, le lokolle motho yo mongwe le yo mongwe a babjago, le lokolle modiradibe yo mongwe le yo mongwe, le lokolle motho yo mongwe le yo mongwe. A nke ye e be kopano ya go lokologa gonabjale, gore Moya wo Mokgethwa o kgone go tla ka gare le go sepela, le go fa letago le tumišo go Modimo. E fe, Morena.

<sup>121</sup> Ke rena batho ba Gago, ga re ka tlase ga bokgoba e ka ba bofe—e ka ba bofe, re lokologile, Morwa o re lokolotše, gomme re lokologile ka nnete go hlankela Morena wa rena le Tate wa rena. Re a Go leboga. Bolela ka Letšatši la Gofaditebogo bakeng sa tokologo! Re na le la kgonthe, re . . . Letšatši le lengwe le le lengwe ke Letšatši la Gofaditebogo, iri ye nngwe le ye nngwe ke Letšatši la Gofaditebogo. Nna, yo nkilego ka ba sefotu, bjale ke kgona go bona, nna, yo ke bego ke le modiradibe, bjale ke phološitšwe.

<sup>122</sup> O Modimo, re lokologile bjang! Re ka kgona bjang go Go fa ditebogo, ditebogo go tšwa pelong ya rena gore Jesu Kriste Morwa wa Modimo ga se a hwa, eupša O a phela magareng ga rena bošegong bjo, o inetefatša Yenamong go phela ka maswao, matete, le mehlolo, o tšhollela Moya wo Mokgethwa godimo ga Kereke ya Gagwe ka matsatšing a a mafelelo, feela pele ga go tšwelela ga Gagwe, gomme maswao le matete a tšwelela mogohle, dilo tše botse. Gomme Modimo wa Legodimo, oo, haleluya! Go fa tumišo le letago go Modimo.

<sup>123</sup> Oo, re Go leboga bjang bakeng sa dilo tše. Ke gofaditebogo ga kgonthe ka pelong ya rena. Amogela ditumišo tša batho ba Gago, Morena. Re a Go rata. Re a tseba gore O gona, gomme Moputsi wa bao ba Go nyakago ka phegelelo.

<sup>124</sup> Tate Modimo, phološa modiradibe, tliša mokgelogi morago gae, tlatša modumedi ka Moya wo Mokgethwa, fodiša balwetši le batlaišwa, ikhweletše letago go Wenamong.

<sup>125</sup> Re ikwela se sengwe se sepela. Mo mengwageng e se mekae ya go feta go bile le se sengwe se diregago, Moya wa Modimo o be o sepela go kgabaganya naga, ditsošeletšo tše kgolo le maswao di laetša go tla ga Gagwe; go na le ditšhišinyego tša lefase mafelong a go fapana, lewatle le tšere go phuhlama ga megalatšhika, le tshwa maphotho a magolo a phulawatle. Oo, dipelo tša batho di palelwa ka letšhogo, tlalelo magareng ga ditšhaba, nako ye

thata, Israele e a bowa, mohlare wa mogo o a khukhuša, re mo nakong ya bofelo. Moya wo Mokgethwa o fa, gomme re a Mo rata, Morena, gomme re a Mo rapela. Gomme wona maatla a Modimo a tla re tšeela Gae go Yena a mangwe a matsatši a ka Tlhatlogong, a tla tsoša bahu, go ya go ile. E fe, Morena.

<sup>126</sup> Tliša ditshepišo tšohle tša Gago go phethega bošegong bjo magareng ga batho ba Gago. Fodiša yo mongwe le yo mongwe wa batho ba, Morena, disakatuku tše di ba emetšego. A nke Moya wa Gago o lebelele fase, O ba bone ge ba di bea fa, O tseba maikemišetšo, O tseba maikaelelo a bona, O tsebile tumelo ya bona, ke a rapela, Modimo, gore O tla fodiša yo mongwe le yo mongwe wa bona bakeng sa letago la Gago Mong. Leineng la Jesu Kriste, re a e kgopela. Amene.

<sup>127</sup> Oo, a go šegofatšwe Leina la Gagwe. Haleluya! Haleluya! Tumišo e be go Modimo. Oo! Ditšhegofatšo tša Gagwe, Bogona bja Gagwe bo no tsikinya, go no tšidifatša soulo ya ka go kgabola le go kgabola go tseba gore wa bothakga, Moya wo Mokgethwa wo mogolo wa Modimo o tšhepišitšwe go tšhollwa ka matsatšing a mafelelo gomme O be a tla fa pula ya tšeola le ya kgogolamooko mmogo. Le bile le pula ya kgogolamooko, tšeola še e hlakane le yona, mediro ye Jesu a e dirilego e tšwelelagape ka Kerekeng, go laetša gore O etla.

<sup>128</sup> Ge ke bile le seatla sa ka godimo go tšwa kua, moriti, kgolekgole o lebeга leutu, ge se batamela kgauswana, se ba phosithifi kudu go fihla se eba seatla sa kgonthe. Yeo ke tsela ye ditšhegofatšo di lego. Lebaka la mengwaga ka morago ga mengwaga ka morago ga mengwaga, ge Kereke e etla fase, maatla a Modimo a golela kgauswana le kgauswana, go fihla bjale E no ba kgauswi le go tšea seswantšho sa Jesu Kriste, Kereke ya Gagwe e a dira, ka maatleng a tsogo ya Gagwe. Maswao ohle ao A a dirilego a tšweletšegape ka Kerekeng gape; re mo nakong ya bofelo. Nyakang Modimo, batho.

<sup>129</sup> Ke a tseba le nagana gore ke itshwara go se tlwaelege kudu go ba moreri, eupša ke tla le netefaletša se: Ge o ikwetše ka tsela ye ke ikwetšego, o tla be o itshwara gampe go feta seo, ke a dumela, ee, mohlomphegi, gobane ke leka go go swara morago, go no ba komana go thuthupa ka pelong ya ka, go nagana ga Modimo wa Legodimo, Yo a hlotšego Magodimo le lefase, o thwi fa le rena gonabjale ka go Lentšu la Gagwe, o inetefatša ka Boyena, go laetša gore O a phela, ga se A hwa, eupša O a phela go ya go ile. Re Mo rata gakaakang! Re Mo leboga gakaakang!

<sup>130</sup> Oo, ga go tšhelete e ka kgonago go a reka, ga go selo se ka kgonago go a hwetša, ke mahala go yo mongwe le yo mongwe, “Mang kapa mang a ratago, a a tle, a nwe go tšwa mothopong wa Morena.” Oo, ga go selo se ka kgonago go tšea lefelo la wona. Ke wa Mathomo, wa Mafelelo, Alefa, Omega, Mathomo, le Mafelelo. O be a le mo pele go eba lefase, O tla ba fa ge lefase le sepetše.

Yena ke bobedi Modu le Lehlogedi la Dafida, Yena ke Naledi ya go Kganya ya Moso. Haleluya! Yena ke Kriste, Morwa wa Modimo yo a phelago, Yena ke Yena wa kgonthe. Gomme re a Mo rata, re a Mo rapela. Yena ke Modimo wa Legodimo a dirilwe nama gomme o dutše magareng ga rena, Sefega sa Tate. Oo, ke Mo rata gakaakang, ke Mo leboga gakaakang!

<sup>131</sup> Nna, modiradibe wa go šokiša, wa go lahlelega, ke thekeselago mekgotheng go nyakile ke foufetše, bjale O mphile mahlo a mabotse, o mphile go phelega go gobotse, o mphile phološo, ditšhegofatšo tšohle tša Modimo, o mphile bagwera, ge batswadi ba ka mong ba ntaketše ntle gomme ba rile ke a gafa, kereke ya gešo e nthakile go tšwa mojakong gomme e rile, “O lahlegetšwe ke monagano wa gagwe.”

<sup>132</sup> Eupša O rile, “Ge le ka tlogela, Ke tla le fa botate, bomme, bagwera.” Haleluya! O Modimo, go dikologa lefase O e dirile, gape, le gape, le gape.

<sup>133</sup> Ke nagana ge moprofeta a boditše Dafida, “Dira tšohle tšeo di lego ka pelong ya gago, ka gore Modimo o na le wena.”

<sup>134</sup> Gomme bošegong bjoo Morena o boletše le moprofeta, o rile, “Eya, botša mohlanka wa Ka Dafida, Ke mo tšere go tšwa go lešaka lela la dinku gomme ka mo fa leina boka banna ba bagolo ba lefase.”

<sup>135</sup> Ge ke nagana ka seo, ka fao Modimo a nntšhitšego ka meleteng ya sebe, a mpha bagwera go dikologa lefase, pelo ya ka e tsikinyaga ka dikgopolo tše tša Leina la Gagwe le legolo. A go šegofatšwe Leina la Morena.

<sup>136</sup> Selo se nnoši: ke no ba maswabi ga ke ne maphelo a mantši go phela go Mo hlankela. O bolela ka go tlogela se sengwe? Oo, ga go selo o se tlogelago, gohle ke go thopa, gohle ke go boelwa. Gomme ge nkabe ke na le maphelo a milione tše lesome, ge ke be nka kgona go boela morago go bogolo bja mengwaga ye lesometshela gomme ka ba kgoši godimo ga lefase lebaka la mengwaga ye dikete tše lesome, goba go hwa gonabjale gomme ka ya Legodimong le Jesu Kriste, ke be ke tla re, “A nke ke ye gonabjale.” Ke tla rata go ya, go no ba le Yena, gobane bjale ke ne Bophelo bjo Bosafelego. Mengwaga ye dikete tše lesome e be e fedile, ke tla be ke ile heleng, eupša bjale ge mengwaga ye dikete tše lesome e feta, ga ke ne nako ye nnyane go feta ke bile ge ke tsena ka fale. Amene. Fše! Nna, nna!

<sup>137</sup> Yena ke kgonthe. Ke mang a dirilego matšoba? Ke mang a beilego mmala ka go ona? Monna wa go swana yo a beilego mmala ka go letšoba, o beile Moya wo Mokgethwa ka pelong ya ka. Letago go Modimo! O mo, ee, mohlomphegi. O se ke wa tšhoga ka Yena, gobane O mo. *Modimo* go ra, “go rapela.” Modimo ke selo sa go rapelwa. Gomme ke rata go Mo rapela. Yena ke Tšohle tša ka ka go Tšohle, Yena ke Khutšo ya ka, Yena ke Tate wa ka, Mme wa ka, Yena ke Tšohle nkilego ka ba le tšona,

Tšohle nka tsogego ka ba le tšona, se sengwe le se sengwe se letše ka gare ga Gagwe. Oo, nna! A re nong go phagamiša diatla tša rena gomme re Mo tumišeg.

<sup>138</sup> O Morena, ke—ke no se tsebe ke bolele eng, Morena. Moya wa Bogona bja Gago o no rwala soulo ya ka go tloga lefelong go ya lefelong. Oo, a nke e phulegele pele bošegong bjo, Morena, seo ke se kgopetšego. E fe, O Morena. O Tate Modimo, romela pele ditšhegofatšo tša Gago godimo ga batho ba Gago. Tlotša batho, romela Moya wo Mokgethwa ka maatla a magolo le meelo ye megolo ya mogau le lerato. E fe, Morena. Ekwa dithapelo tša rena. Re tumiša Wena, re a Go rata, re phagamišetša diatla tša rena go Wena, re phagamišetša dipelo tša rena go Wena. Wena o bophelo bja rena, soulo ya rena, borena, dijo tša rena, meetse a rena, Wena o bophelo bja rena, pono ya rena, ka moka tše re lego tšona, re a phela gomme re hema ka Wena, Morena.

<sup>139</sup> Oo, re tšee, Morena, re kgoloke, re beakanye, re tloše go tloga lefaseng, O Modimo, bea Moya wa Gago ka go rena. O rile, “Le batho ba moswananoši, boprsta bja bogoši, boprsta bja semoya bo neela dimpho tša semoya,” dikenywa tša dipounama tša rena, go fa tumišo go Modimo. Seo ke se re se dirago gonabjale, Morena, go fa tumišo go Modimo wa rena, go dira sehlabelo, go fošetša dipounama tša rena godimo, tumišo ya rena, le go re, “Re a Go rata, Morena, ga re kgathale se e ka ba mang a se bolelago, re a Go rata. Wena o Modimo wa rena, Wena o Mophološi wa rena, Wena o Mofodiši wa rena, Wena o Kgoši ya rena, Wena o phološo ya rena, Wena o bophelo bja rena, Wena o bja rena. . . Wena o tšohle tšeo re lego tšona Morena. Ke Wena seo go rena, gomme re leboga Wena ka sona.”

<sup>140</sup> Re šegofatše, Morena. Re letetše Wena, re letetše Wena go re hlhla, go re romela kae kapa kae, dira eng kapa eng ka rena O nyakago. Re tšeele ka seatleng sa Gago, Wena o mmopi, rena re letsopa, re kgoloke gomme o re dire ka morago ga tsela ya Gago Mong, Morena, re dire diswantšho tša Modimo. E fe, Morena.

<sup>141</sup> Bjale, Tate Modimo, ge re neela balwetši go Wena bošegong bjo, ge ba kgabaganya sefala se a nke Moya wo Mokgethwa o tle, a nke Morongwa wa Modimo Yo a boletšego le nna godimo mošola ka go tšhilo yela bošegong bjola, a nke Yena Yo a boletšego gohle go bapa le leeto la bophelo, a nke A tle fa bošegong bjo, Morena, gomme a eme le go tiišetša Mantšu a, le go dira Beibele ye go phela ka boswa gape. E fe, Morena. A nke go be bjalo, e fe.

<sup>142</sup> A nke motho yo mongwe le yo mongwe a babjago yoo a lego fa a e bone, a hlalale, gomme a Go amogele bjalo ka Mofodiši wa bona; a nke modiradibe a e bone, a hlalale, gomme a Go amogela bjalo ka Mophološi wa bona; a nke modumedi a e bone, a hlalale, gomme a tlatšwe ka Moya wo Mokgethwa. Ge Johane a kgonne go amogela Moya wo Mokgethwa dikgwedi tše tharo pele a tswalwa

ge a be a robetše a hwile ka popelong ya mmagwe, E swanetše go dira eng go rena bošegong bjo, Morena? Oo, romela Moya wo Mokgethwa gomme o tlišetše Lentšu la Gago le legolo. Ka Leina la Jesu, re a rapela. Amene.

Ke a Mo rata, ke a Mo rata  
Gobane O nthatile pele  
Gomme a lefela phološo ya ka  
Godimo ga mohlare wa Khalibari.

143 Bahumagadi opelang pele, *Ke A Mo Rata*:

Ke a Mo rata, . . .

Bjale banna:

. . . Ke a Mo rata

Bohle mmogo:

Gobane O ratile pele. . .  
Gomme a lefela phološo ya ka  
Godimo ga mohlare wa Khalibari.

144 (Tee go fihla go eng? Eng? D?) [Kgaetšedi o bolela ka maleme, ngwanešu o fa tlhathollo—Mor.]

145 Tumišang Morena. Tumišang Morena. Thabo ya Morena ke maatla a rena, a ga se yona? Yeo ke maatla a rena, ke ka mokgwa wo re phelago, ke ka thabo ya Morena ye e lego magareng ga rena.

146 Billy o sa tšo mpotša o file karata ya thapelo D, tee go fihla go masometlhano. Ke mang a nago D, nomoro tee? Phagamiša seatla sa gago. Karata ya thapelo D, nomoro tee. Nomoro pedi, nomoro tharo. Nomoro pedi. A nomoro pedi e emeletše? D, nomoro pedi, nomoro tharo, nomoro nne. Nne e kae? Phagamišetša seatla sa gago godimo. Nomoro nne, tlhano, tshela, šupa, seswai, senyane, lesome. Lokologanang thwi godimo fa bjale. Oo, nna! Mmm!

. . . dumela feela,  
Dilo tšohle di a kgonega, dumela feela;  
Dumela feela, dumela feela,  
Dilo tšohle di a kgonega, dumela feela.

147 Go lokile, nomoro lesome, nomoro lesometee. D, nomoro lesometee, ke mang a nago le yona? D, lesometee. O šetše a le godimo kua? Go lokile, ba beeng ka mothalong, morago. D, lesometee, D, lesomepedi. Ke mang a nago D, lesomepedi? Wena, morwa? Go lokile, etla o tšee lefelo la gago. D, lesomepedi, D, lesometharo, phagamiša seatla sa gago, go lokile. Lesomenne, phagamiša seatla sa gago, D, lesomenne. D, lesometlhano, lesometshela, lesomesupa, lesomeseswai, lesomesenyane, masomepedi. D, masomepedi, ga se ke bone seatla sa gago, go lokile, seo se kaone.

148 Go lokile, nno tšwelangpele le lokologana morago fale. Ba bangwe ba diašara, ge le ka rata, mo thušeng morago kua go

lokologanya bale. D, masomepedi. Ba šuthetše morago, Billy, šuthetša mothalo morago, ba bee go dikologa lehlakore. A re hwetšeng mothalo wo mogolo godimo kua.

<sup>149</sup> Oo, ke ikwela gabotse! Amene. Amene. Nka se fetolanye se bakeng sa lefeela. Ge ke gafa, e nong go ntlogela ke nnoši, ke thabile ka tsela ye. Ke thabile kudu ka mokgwa wo go feta ge ke bile le monagano wa ka wa maleba, bjalo ka ge le o bitša, gona. Ke na le monagano wa ka wa maleba, ke na le. . . Ke nyaka monagano wa Kriste, seo ke se ke se nyakago. Gomme go kudu, ka mehla, kgahlanong le lefase.

<sup>150</sup> Go lokile, D, masomepedi. Masomepedi tee. Ke mang a nago D, masomepedi tee? Go lokile, mohlomphegi, thwi fao. Masomepedi pedi, phagamiša seatla sa gago. Masomepedi tharo, masomepedi nne, masomepedi tlhano, masomepedi tshela, masomepedi šupa, masomepedi seswai, masomepedi senyane, masometharo. Ke mang a nago D, masometharo? Ga se ke bone seatla sela. D, masometharo. Go lokile morago kua, kgaetšedi, etla thwi pele.

<sup>151</sup> Go lokile, re mohuta wa go dumelela, kafao ba ka se. . . re tla. . . ya go lokologana. Bjale elelwang, mang kapa mang yo a nago le karata ya thapelo, e sware, o ya go tla godimo sefaleng. Le a bona? Re ya go go rapelela. Re go fa karata ya thapelo, re tlamagile go dira seo. Oo, go makatša bjang!

<sup>152</sup> Masometharo tee. Ke mang a nago D, masometharo tee? Moragorago. Masometharo pedi, masometharo tharo, masometharo nne, masometharo nne, masometharo tlhano, masometharo tshela, masometharo šupa, masometharo seswai, masometharo senyane, masomenne. D, tee go fihla masomenne. Ke tše kae a rilego o ba file? [Ngwanešu o re, “O rile masometlhano.”—Mor.] Masometlhano.

<sup>153</sup> Ga re tsebe feela se se tla diregago ka mothalong wa thapelo, se ka no ema, sa thoma, le tseba ka fao go lego. Ke ka baka leo re ba hwetšago go ya ka nomoro, gobane ga re tsebe feela mo e tla bago.

<sup>154</sup> Go lokile, masomenne tee. Ke mang a nago D, masomenne tee? Fale. Go lokile, masomenne pedi, masomenne pedi, go lokile. Masomenne tharo, masomenne nne, masomenne tlhano. Masomenne tlhano, ga se ke e bone. Go lokile. Masomenne tshela. Etle thwi godimo fa. Masomenne šupa, masomenne seswai, masomenne senyane, masometlhano. Ke mang a nago karata ya thapelo masometlhano? Go lokile. Ke tše kae a. . . ? Masometlhano? Ke a thanka ke bohle ba bona. Bohle. . .

<sup>155</sup> Bjale, go na le dikarata tša thapelo tše di phatlaladišwego. Go ka no ba ba bangwe ba ba, re ka no se fihle go kgabola, eupša a nke ba eme ka mothalong, seo se ka ba thuša.

<sup>156</sup> Kafao, o a tseba o fa motho karata ya thapelo, o fodišitšwe diphesente tše masomeseswai thwi nako yeo. Bašemane ba re ge

ba efa yo mongwe karata ya thapelo, ba re, “Aa!” Seo—seo se dira se sengwe, le a bona, ba dire ba e dumele. Go lokile. Bjale, ba šwalalane ntle. Bjale elelwang, pele ditirelo tše di tswalela, go tla ba bošego bjo botee bjoo re tla tšeago karata ye nngwe le ye nngwe ya thapelo ka moagong, le a bona, ra ba tliša sefaleng, yo mongwe le yo mongwe.

157 Bjale, ke ba bakae ba se nago karata ya thapelo gomme o a babja, gomme o nyaka Morena a go fodiša? Phagamiša seatla sa gago. Go lokile, e no dumela, seo ke sohle o hlokago go se dira. O swanetše go ba lokologanya godimo fale motsotso? A re nong go hama gabonolo ka kgonthe bjale go renabeng, ge re sa dira komana bakeng sa mothalo.

158 Bjale, elelwang, a go na le yo mongwe mo lekga la bona la mathomo? Oo, nna! Ke a le leboga. Le a bona, ke—ke duma bohle ba ka tla bošegong bjo botee, nako ye nngwe. A go na le yo mongwe mo yo a sego a ke a ba ka go ye nngwe ya dikopano tša ka pele? A re boneng diatla tša lena. Gabotse, lebelelang seo. Re thabile kudu le mo.

159 Nka—nka no swanela go ya go kgabola se feela gannyane nthatana. Ke be ke ikemišeditše ka pelong ya ka go dira se sengwe gape bošegong bjo. Ke ikemišeditše ka pelong ya ka go no tliša mothalo wola wa thapelo thwi go otlologa go kgabola le go ba rapelela. Seo ke se ke bego ke nagana go se dira, ke ka baka leo ke biditšego mothalo wola. Nka no swanela go hlaloša se go ba bangwe ba batho, bosetlaboswana gona, ge le . . . motsotso feela.

160 Le a bona, re a dumela re phela ka matšatšing a mafelelo. Re a dumela gore Jesu Kriste o tshepišitše ge A be a le lefaseng, “Yo a dumelago go Nna, mediro ye Ke e dirago, o tla e dira le yena.” O rile, “Lebakana le lennyane gomme lefase le ka se Mpone gape, efela lena le tla Mpona, gobane Ke tla ba le lena, ebile ka go lena go fihla bofelong bja lefase.” Bjale, ge re ka kgona go hwetša se Jesu a bilego nako ye telele ya go feta, mediro ye A e dirilego, gona re ka kgona go hwetša mediro ye A tla e dirago bjale. A yeo ke nnete, bosetlaboswana?

161 Bjale, a re nong go tšea nakwana feela le go hwetša mediro ye A e dirilego, a re nong go nagana. A O ipiditše ka Boyena Mofodiši? Aowa. A O tlelimile go fodiša? Aowa. O rile, “Ga se Nna yoo a dirago mediro, ke Tate wa Ka yoo a dulago ka go Nna.” A yeo ke nnete?

162 Gomme ge A fetile go kgabola mo—mo mogobe . . . kgauswi le mogobe wa Bethesda, fale go robetše mašaba a magolo a batho, dihlotša, digole, difofu, ba go omelela, ba letile go huduega ga meetse. Gomme Jesu . . . Go be go le monna yo motee a robetše fale, o—o be a se a fofala, o be a kgona go sepela, eupša o bile le mohuta tsoko wa bothata, mohlomongwe ke bothata bja proseteite, goba—goba bolwetši bja mafahla. Bo be bo dibegile,

o bile le bjona lebaka la mengwaga ye mentši, ye masometharo seswai, ke a dumela, bo be bo sa ye go mmolaya. O be a robetše godimo ga mpetiana, gomme O rile, “A o nyaka go fola?”

<sup>163</sup> Gomme o rile, “Mohlomphegi, ga ke ne yo a mpeago ka meetseng.” Bjale, eelwang, Jesu o rile O tsebile monna o bile ka tselo ye nako ye telele. Bjale, O e tsebile.

<sup>164</sup> Bjale, O mo fodišitše, gomme a sepela, gomme a tlogela lešaba lela le robetše kua. A yeo ke nnete? Jesu Kriste wa go swana maabane, lehono, le go ya go ile, gomme o dirile seo? O dirile. Morago O ile a botšišwa, gomme O boletše eng? Bjale, yoo ke Mokgethwa Johane 5:19, bjale theetšang Mantšu a Gagwe: “Ruri, ruri, Ke re go lena, Morwa ga a kgone go dira selo ka go Yenamong, eupša se A bonago Tate a se dira, seo Morwa o se dira go swana.

<sup>165</sup> A re yeng morago gomme re bone ge eba yeo ke therešo. Ka morago ga ge A tloiditšwe ke Modimo, a tladitšwe ka Moya wo Mokgethwa . . . Gobane Mesia o be a le Yena Motlotšwa, a yeo ke nnete, baena? Yena—Yena Motlotšwa. O be a le motho, ge go etla go motho, O tswetšwe, a ja, a nwa, o bile le nama le madi boka re na le. Eupša Madi a Gagwe a be a se. . . O be a se Mojuda, ebile O be a se Montle, O be a le Modimo. Le a bona?

<sup>166</sup> Madi a tšwa go bong bja tona. Ke ba bakae ba tsebago seo? O be a se madi a mme wa Gagwe, o be a le Mojuda. Gomme gona Tate wa Gagwe e be e le Mang? Tate wa Gagwe e be e le mang? Modimo. Gona Modimo ga a ne madi gobane Modimo ke Moya. Eupša O hlotše Sele ya Madi ya kgarebe ka popelong ya Maria. Ntle le tumo ya thobalano e tlišitše pele Morwa, Kriste Jesu, ka Madi *ale* ke hlwekišitšwe, ka Madi *ale* modiradibe o a hlwekišwa, ka Madi *ale* ke se ke nago le tumelo bakeng sa phodišo ye fa, ka Madi *ale* o fetola bophelo bja ka, ao ke Madi.

<sup>167</sup> Ge A be a le bogolo bja mengwaga ye masometharo, Moya wo Mokgethwa o tlile godimo ga Gagwe boka leeba, gomme O thomile bodiredi bja Gagwe bja mathomo. A re boneng se A se dirilego, “Mediro ye Ke e dirago.” Selo sa pele A se dirilego, re hwetša go bile le moisa, Andrea o ile gomme a hwetša Petro, leina la gagwe e be e le Simone nako yeo, gomme a mo tliša go Jesu, gomme Jesu a re go yena, “Leina la gago ke Simone; gomme leina la tatago ke Jona. Wena o morwa wa Jona.” A yeo ke nnete? Selo sa pele A se dirilego.

<sup>168</sup> Bjale, a le a dumela gore Simone . . . O—o be a le Mofarisei wa kereke ya Bafarisei, re rutwa ke dikoronika tša Beibele gore o be a le Mofarisei, kagona o be a rutilwe gore go be go tla ba le Moprofeta yo a tsogago yoo Moshe a rilego, “Go tla ba le Moprofeta yo a tsogago.”

<sup>169</sup> Ke ba bakae ba tsebago gore Mesia o be a swanetše go ba Moprofeta? “Morena Modimo wa lena o tla tsoša Moprofeta boka nna,” go boletše Moshe. “O swanetše go ba Modimo Moprofeta.”

170 Gomme ka pela ge a hweditše gore O tsebile o be a le mang, o Mo lemogile. Morago moisa a bitšwago Filipi o tlogile, o ile godimo ka nageng ye nngwe dimaele tše lesometlhano go dikologa dithaba, gomme o hweditše moisa ka leina la Nathaniele, mogwera wa gagwe, ka tlase ga mohlare, a rapela. O rile, “Etna, bona Yo re mo hweditšego, Jesu wa Nasaretha, Morwa wa Josefa.”

O rile, “Bjale, a go ka ba le selo e ka ba sefe se sebotse go tšwa Nasaretha?”

171 Ke nagana o mo fa karabo ye kaonekaone motho e ka ba mang a ka kgonago go e fa, o rile, “Etna gomme o bone.” O se ke wa no dula fao gomme wa swaswalatša, etla, ikhweletše ka bowena. Gomme ke kgona go eleletša a eya go dikologa thaba, ba rile, “E re, o tseba motheadihlapi yola wa kgale o rekilego yela, tšona dihlapi go tloga nako yela, gomme ebile o be a sa kgone go saena rasiti yela, o be a sa kgone go saena leina la gagwe goba selo?”

“Ee. Oo, Simone, o bolela ka mo—mo motheadihlapi, motheadihlapi yo mogolo, ee.”

“O tlile godimo pele ga Yena yo re mo tsebago go ba Mesia, gomme O mmoditše se leina la gagwe le bego le le, le go mmotša leina la tatagwe.”

“Aa, eya pele,” go boletše Nathaniele. “O ile le melodi ya makaba.”

172 Eupša ka pela ge a sepeletše godimo pele ga phuthego, se sengwe boka se, Jesu mohlomongwe o be a direla balwetši, O lebeletše go dikologa, O mmone a etla gomme O rile, “Bonang Moisraele, yo ka go yena go sego bomenetša.”

173 Gobaneng, e mo thenkgolotše go tloga maotong a gagwe! O tsebile bjang o be a le Moisraele? E sego ka tsela ye a bego a apere, gobane bohle ba bohlabela ba be ba apere go swana, setše, kobo. O rile, “Moisraele, yo ka go yena go sego bomenetša.” Ka mantšu a mangwe, mo—mo monna wa go hloka bomenetša, Mokriste, modumedi wa kgonthe, re tla mmitša.

O rile, “Rabi,” go ra *morutiši*, “ke neng O kilego wa ntseba? Gobaneng, le ke lekga la rena la mathomo go tsoge ra kopana, O ntsebile neng?”

174 O rile, “Pele Filipi a go bitša ge o be o le ka tlase ga mohlare, Ke go bone.” A mahlo! Dimaele tše lesometlhano go dikologa thaba, “Ke go bone pele o etla kopanong, ka tlase ga mohlare wola.”

O rile, “Rabi, Wena o Morwa wa Modimo; Wena o Kgoši ya Israele.”

Jesu o rile, “Gobane Ke go boditše seo, o a dumela? O tla bona tše kgolwane go feta se.”

175 Ka gona, nnete go be go le bao ba emego kua ba ba rilego, “Bjale, monna yola,” ga se ba kgone go e gana e be e sa ye pele, eupša ba rile, “ke Beletsebubu.” Ke ba bakae ba tsebago seo? Beletsebubu ke mmolelelamahlatse, diabololo. “O dira seo ka maatla a diabololo.”

176 Gomme Jesu o rile, “Ke le lebalela bakeng sa seo, eupša letšatši le lengwe Moya wo Mokgethwa o tla go dira selo sa go swana seo Ke se dirago, gomme lentšu le tee kgahlanong le Wona le ka se tsoge la lebalelwa ka go lefase le, goba lefase le le tlogo.” Gobane ba bitša Moya wa Modimo selo sa ditšhila, Lengwalo le bolela seo.

177 Bjale, re hwetša gore dilo tše dintši. . . O ile godimo Samaria, gomme seo ke se sengwe setšh- . . . morafe wo mongwe wa batho, boka batho ba Hama, Seme, le batho ba Jafete. Bjale, O fihlile go Mosamaria e lego seripa sa Mojuda le Montle. Gomme mosadi o be a le sedibeng, gomme O boletše le yena metsotso e se mekae, O rile, “Ntlišetše seno.”

178 O rile, “Gabotse go tebile, ga se setlwaedi go Wena go—go bitša Mojuda go . . . Mojuda go kgopela Mosamaria se sengwe boka seo.” O rile, “Ga re ne tirišano seng sa rena.”

Gomme ge e ile pele, poledišano e ile pele, mafelelong, O rile, “Sepela, tšea mogatšago.”

Gomme o ile go tšea. . . O rile, “Gobaneng, ga ke ne mogatša.”

179 Gomme, a yo mongwe o a babja morago kua? [Kgaetšedi o re, “Ee.”—Mor.] Go lokile, mmeeng thwi fase, enong—enong go mmea fase. Bjale, a yoo ke modiredi ka diatla tša gagwe godimo ga gagwe? Bea diatla tša gago godimo ga gagwe.

180 Morena Modimo, Leineng la Jesu Kriste, Morwa wa Modimo, tloša bolwetši bjo bobo ke kgaetšedi yola, a nke maatla a Modimo a fodiše mmele wa gagwe. Re bo lahlela kgole ka tumelo. Ka Leina la Jesu. Amene.

181 Go lokile. O se belaele, go tla loka bjale. Amene.

182 Gomme kafao ge mosadi a etla, gomme o rile, “Ke. . .”

O rile, “Sepela, tšea mogatšago.”

O rile, “Ga ke ne mogatša.”

O rile, “Yeo ke therešo, o bile le ba bahlano, gomme yo o dulago le yena ga se mogatšago.”

183 O boletše eng, “Mohlomphegi, nna. . .” Bjale theetšang se bjale: “Mohlomphegi, ke a bona gore O Moprofeta.” Ke ba bakae ba tsebago seo? “Ke a bona gore. . .” Ge o kitimiša tšhupetšo yela, e ra Moprofeta *yola* yo a bego a swanetše go tla. “Ke a bona gore O Moprofeta.” O rile, “Re a tseba ge Mesia a etla, O tla re botša dilo tše.” A yeo ke nnete? Gabotse, leo e be e le leswao la Mesia.

Gomme O rile, “Ke nna Yena yoo a bolelago le wena.”

184 Leswao lela la go swana la Bomesia le tla swana lehono bjalo ka ge le bile nakong yela, a yeo ke nnete? Go swanetše go ba ge Jesu Kriste a swana maabane, lehono, le go ya go ile. “Mediro ye Ke e dirago, le tla e dira le lena.”

185 Bjale, ge mosadi a hloka moya tsoko, o a babja, goba mohuta wa go idibala, go lokile, o ka mo iša go hwetša moya, go lokile, ge a nyaka. Eupša o se ke. . . E no ba le tumelo, o tla ba gabotse, e no mo tlogela a mnoši. Go lokile.

186 Bjale, efang šedi ya lena ka tsela ye. Bjale, ke be ke eya go kitimiša mothalo wo go kgabola, go no ya thwi go otlogoga go kgabola le go le rapelela. Ke ba bakae, ge ke. . . e re ge ke dira seo, o a dumela o a fola? Phagamišang diatla tša lena. Gobane “Maswao a a tla latela bona ba ba dumelago: Ge ba bea diatla godimo. . .”

187 Ke ba bakae ka moagong wo ba lego basetsebje go nna bao ke sa tsebego selo ka bona? Phagamišang diatla tša lena. Gohle go dikologa, ga ke tsebe selo ka lena. Go lokile, ge Jesu Kriste a swana maabane, lehono, le go ya go ile. . .

188 Fa, ke mosetsebje go wena? [Ngwanešu o re, “Ee, mohlomphegi.”—Mor.]

189 Go lokile, go batheeletši ba baswa. Feela yo motee yo, goba felotsoko yo mongwe o hloka thušo tsoko go bapa le mothalo re tla ema.

190 Ga ke tsebe monna yo, ga se nke ka ke ka mmona, ga ke tsebe nthatana go feta se a se emetšego fa go feta lefeela. Modimo o a tseba. Bjale, ge Jesu a tsogile go tšwa bahung, gomme ke boletše therešo ka Yena, gona ge A tsogile, gomme le ke leswao la mafelelo leo A le tshepišitšego feela boka A rile, “Bjalo ka ge go bile ka matšatšing a Sodoma,” gomme seo ke tlwa se Modimo a se dirilego ka matšatšing a Sodoma. . .

191 Ke ba bakae ba bilego fa beke ye go kweiša seo? Leo ke leswao tlwa Modimo a le filego Sodoma. Gomme Jesu o rile e tla boeletša gape feela pele ga go Tla ga Gagwe. Ke ba bakae ba tsebago Beibele e bolela seo? Ge Morongwa ka mokokotlo wa Gagwe o furaletše, gomme o rile, “Abraham, mogatšago o kae, Sarah?” O tsebile bjang o be a le mang?

O rile, “O ka tenteng.”

192 Gomme O boletše se A. . . se bego se eya go direga go yena. Gomme o segile ka tenteng. Gomme O rile, “Gobaneng a segile?” Le a bona? O rile seo se tla direga gape pele ga nako ya bofelo.

193 Ga ke tsebe monna, ga se ka ke ka mmona, eupša še—še taba go swana le ge Morena wa rena le Simone ba kopane mmogo, yeo ke nnete, tsela ya go swana, go lokile, rena re le basetsebane. Bjale, monna a ka kgona go ba mosedumelemodimo, a ka kgona go ba moikaketši, a ka kgona go ba Mokriste. A ka kgona go be a babja, a ka kgona go be a hloka, ga—ga ke tsebe, a ka kgona

go be a hloka matlotlo, ga ke tsebe se a se nyakago, o nno ema fale, monna. Eupša go lena bosetlaboswana, le monna, seatla sa ka sese, ga se nke ka ke ka mmona bophelong bja ka, ka go tseba, o phagamišitše seatla sa gagwe gore ke be ke sa mo tsebe, goba o be a sa ntsebe. A yeo ga se nnete, mohlomphegi? Yeo ke nnete. Phagamiša seatla sa gago gore batho ba se bone. Go lokile.

<sup>194</sup> Banna ba babedi šeba, bjale ge Jesu Kriste a tsogile go tšwa bahung. . . Bjale, ge monna a babja gomme a hloka phodišo, ke be nka se kgone go dira seo, gobane tšhegofatšo e ka ba efe ya topollo yeo Jesu a e hwetšego e šetše e lefetšwe. Bjale, ge Kriste a le mo go le bjalo, A ka kgona go bolela le wena le go go botša se sengwe ka wenamong. A yeo ke nnete?

<sup>195</sup> Ke seemo sa letšhogo, o tšhogile go fetiša ka kgonthe Gomme ntle le seo, o na le yo mongwe ka monaganong wa gago yo o mo rapedišago. Bao ke bana ba babedi, ba ka sepetlele sa monagano. Yeo ke nnete tlwa. O a ba rapediša. Leina la gago ke Mna. McCree. Eya gae, amogela phodišo ya gago gomme o dirwe go fola, Leineng la Jesu.

O a dumela? Eba le tumelo ka go Modimo.

<sup>196</sup> Go lokile, etla. Eba le tumelo. Bjale, ke no ya go thoma go rapelela batho bjale. Eupša ema, mosadi yo mo, motsotso feela. Ke nyaka go tšea monna le mosadi, gore ba kgone go bona.

<sup>197</sup> Go lokile. Re basetsebane seng sa rena. Jesu Kriste o a re tseba bobedi, a ga A dire? Ga—ga ke go tsebe, ga o ntsebe, kafa o re basetsebane. Eupša ga o mo bakeng sa gagomong, o mo bakeng sa yo mongwe gape. O šetše o amogetše phodišo ya gago, bošegong bja go feta. Yeo ke therešo. Go lokile. Eupša o fa bakeng sa mogatšago, ga a mo, o ka nageng ya Oregon, o na le kankere gomme o kgelogile, gomme o mo bakeng sa gagwe. Yeo ke nnete. Seo ke O RIALO MORENA. Sepela dumela.

Eba le tumelo go Modimo. O a dumela?

<sup>198</sup> Bjale, a re nong, a re rapeleng bjale. Ke ba bakae ba bosetlaboswana ba dumelago bjale? Phagamišetša seatla sa gago godimo, o re, “Ke a dumela.” Modimo a go šegofatše. Gabotse. Go lokile bjale, go fetša mothalo wo, ke na le bona bohle ba eme mo. A re nong go ba rapelela, re bee diatla tša rena godimo ga bona ge ba feta kgauswi. Go lokile. Morena o tseba se e lego mabapi le sona.

A re tle, kgaetšedi.

<sup>199</sup> Bjale, Tate Modimo, ke a rapela le go bea diatla ge tlotšo ya Moya wo Mokgethwa e sa le godimo ga ka, bakeng sa mosadi yo. [Ga go selo go theipi—Mor.]

<sup>200</sup> Eya gae, dirwa go fola. Dumela ka pelo ya gago yohle, gomme o tla fola.

<sup>201</sup> Le a bona? Ke—ke—ke. . . Moya wo Mokgethwa o fa, o a e dumela. A le a e dumela? Le a bona? Ga se. . . Ge bona batho ba

feta kgauswi, gobane ga se ke e bolele, seo ga se re gore ga ba fodišwe. Le a bona, O sa le mo.

<sup>202</sup> Fa, mosadi yo. Re basetsebane seng sa rena, Morena Jesu o a re tseba bobedi. O a dumela A ka nkutollela seo bothata bja gago e lego? Go lokile. O na le seemo sa letšhogo, o tshwenywa ke hlogo ya gago, ditlhakahlakano. O a dumela O a go tseba? Leina la gago ke Alice Wilson. O dula 204, yeo ke nnete, ke nomoro ya mokgotheng wa gago. O a dumela gore o fodišitšwe bjale? Eya gae, o na le phodišo ya gago. Modimo a go šegofatše.

O a dumela, kgaetšedi? Ke go bona o hlotša. O a dumela Modimo o tla go fodiša?

Leineng la Jesu Kriste, a nke o fodišwe. Amene.

Etla. O a dumela, ngwanešu?

Leineng la Jesu Kriste, a nke o amogele phodišo ya gago.

<sup>203</sup> Elelwang Leina lela la go swana leo le dirilego Johane go taboga ge a be a hwile, le biditšwe godimo ga gago, ge tlotšo ya Moya wo Mokgethwa e sa le fa. Eya o hlalala.

Morena Jesu, fodiša yo, ngwanešu wa ka, mo dire a fole. Leineng la Jesu Kriste. Amene.

Etla, kgaetšedi wa ka.

Leineng la Jesu Kriste, a nke o dirwe go fola. Amene.

<sup>204</sup> Etla, kgaetšedi wa ka. Mo dumele bjale?

<sup>205</sup> Leineng la Jesu Kriste, ke bea diatla tša ka godimo ga gagwe. O rile, “Maswao a a tla latela bona ba ba dumelago.” A nke a fodišwe. Amene.

O a e dumela, ngwanešu wa ka?

Leineng la Jesu Kriste, ke bea diatla godimo ga ngwanešu wa ka bakeng sa phodišo ya gagwe. Amene.

Etla bjale. Dumela ka pelo ya gago yohle. [Ga go selo go theipi—Mor.]

<sup>206</sup> . . . eupša ga o bakeng sa gagomong, bakeng sa yo mongwe gape, ba ne kankere, ba dula ka Arkansas. Sepela, o dumela, ba tla fola. E no tšwelapele o dumela, tšwelapele o dumela, tšwelapele o rapela.

Leineng la Jesu Kriste, a nke ngwanešu wa ka a fodišwe. Amene.

<sup>207</sup> O a dumela? Eya o ikhweletše hambeka bjale. Mogodu wola wa kgale wa go tšhoga o go tlogetše.

Leineng la Jesu Kriste, a nke ngwanešu wa ka a fodišwe. Amene. [Ga go selo go theipi—Mor.]

<sup>208</sup> O dutše thwi morago fale bothata bjo bonnyane nthatana bja leihlo, Modimo o go dira o fole, eya gae, o fole. Jesu Kriste o go fodišitše.

Leineng la Jesu Kriste, a nke kgaetšedi wa ka a fodišwe.

Leineng la Jesu Kriste, a nke kgaetšedi wa ka a—a fodišwe.

209 E morago kgole kudu, E thwi morago mo ka bogareng, basadi ba babedi šebale, yo motee wa bona o na le ditšhika tša go photha madi; yo motee a dutšego kgauswi le yena o na le se sengwe sa phošo ka molala wa gagwe le bothata bja teng. Phagamelang godimo, Jesu Kriste o le dira le fole.

210 Haleluya! Dumelang. Ba be ba dutše fale ba mo rapediša, seo ke se se e dirilego. Rapelelanang seng. Eba le tumelo. Le a bona? E no ba le tumelo ka go Modimo.

Leineng la Jesu Kriste, eya gomme o dirwe go fola. Amene.

Etla, morategi kgaetšedi wa ka.

Leineng la Jesu Kriste, a nke a fodišwe.

Etla, ngwanešu wa ka.

Leineng la Jesu Kriste, a nke a fodišwe. E fe.

211 Mošemane yo monnyane yo, O Morena Modimo, fodiša yo mošemane yo monnyane yo, wa segole, gomme a nke a sepele gomme a fole, ka Leina la Jesu Kriste.

Šegofatša kgaetšedi wa rena gomme mo fodiše, ka Leina la Jesu.

Fodiša ngwanešu wa ka, Tate, ke rapela ka Leina la Jesu. Amene.

Etla, kgaetšedi, morategi.

Leineng la Jesu Kriste, a nke a fodišwe.

Leineng la Jesu Kriste, a nke kgaetšedi wa ka a fodišwe. Amene.

Leineng la Jesu Kriste, a nke ngwanešu wa ka a fodišwe.

Leineng la Jesu Kriste, a nke ngwanešu wa ka a fodišwe.

212 O dutše thwi morago mo, o ntebeletše, mafelelong a mothalo, mohumagadi kua ka letheka le bothata bja mokokotlo, Jesu Kriste o go dira o fole. Eya gae gomme o dumele. Modimo a go šegofatše.

Ka Leina la Jesu, a nke o fodišwe. Amene.

213 Go bjang? (A ye e be e le...?) [Ngwanešu o re, “Ke ya mafelelo.”—Mor.] Re basetsebane seng sa rena, mohlomphegi. Ga ke go tsebe, ga se ka ke ka go bona, re no ba banna ba ba kopanego mo lefaseng, yeo ke phetho. A o a dumela gore Modimo wa Legodimo, o tsoitše Morwa wa Gagwe Jesu, o a go tseba? O dumela seo? Yeo ke tumelo ye botse. Ge Modimo a ka mpotša se bothata bja gago e lego, o ntumela go ba mohlanka wa Gagwe? O na le atheraithisi, bakeng sa selo se tee, ga o kgone le go tsoga mosong. Yeo ke nnete. Gona o na le bothata bja sebetse. Gomme o Mokatoliki ka tumelo. Yeo ke nnete.

<sup>214</sup> O na le mogwera le wena, o dutše thwi fale. O a dumela Modimo a ka mpotša se bothata bja gagwe e lego? O a e dumela? O na le bothata ka leoto la gagwe, matolo a gagwe, o na le ditlhakahlakano, boka. Yeo ke nnete, a ga se yona? Se sengwe le se sengwe se ile, eyang gae gomme le fole, bobedi bja lena. Jesu Kriste o go dira o fole, mohlomphegi. Amene.

<sup>215</sup> Amene. A le a dumela? “Dilo tšohle di a kgonega, dumela feela.” Ke ba bakae ba lena ka moka le dumelago ka dipelo tša lena tšohle? Bjale, Beibele e rile, “Maswao a a tla latela bona ba ba dumelago.” Ga re na le nako ya go bitša dikarata tše dingwe gape tša thapelo, ke ka morago ga lesome. Beanang diatla tša lena godimo ga seng sa lena. Ke tla le rapelela go tšwa thwi mo. Ga ke kgathale se bothata bja gago e lego, e nong go beana diatla tša lena seng sa lena. Ga ke kgathale se bothata bja gago e lego, Beibele e rile, “Maswao a a tla latela bona ba ba dumelago.”

<sup>216</sup> Moya wo Mokgethwa o a nthabiša, O a le thabiša, kafao Ke Modimo wa go swana. Yo mongwe le yo mongwe wa lena, mogohle, beanang diatla go kgabaganya seng sa lena gomme le dumele ka tšohle tšeo di lego ka go lena.

<sup>217</sup> O Morena Modimo, Mohlodi wa Magodimo le lefase, bjale ke kgalemela diabolo, maatla a lenaba.

<sup>218</sup> Sathane, o ka se kgone go swara batho ba botelele bjo bo itšego, ba dumela Lentšu feela bjalo ka ge Maria a dirile, ba amogela Lentšu feela boka Maria a dirile. Leineng la Jesu Kriste, etšwa go bona! Lena meboya ye mebe ya bolwetši le ditlaišego, tlogelang batho, gore ba dirwe go fola! Ka Jesu Kriste. Amene.



59-1126 Jehofa Wa Mehlolo  
Santa Clara County Fairgrounds  
San Jose, California U.S.A.

NORTH SOTHO

©2026 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)